

來身非分別心所能觀見。若以汝身即如來身。汝等所住即如來住。乃至一切有情之身。即如來身。一切有情之所住處。即如來住。空有一相。自他無二。不舍有為。而證無為。不離無為。而悟有為。以如是心。觀如來身及與住處。爾乃可見。汝等既有分別心。欲見如來無相境界。設經無量塵沙劫。數莫復能得。於是眾會悲感懊惱。離分別心。安住正念。身心內外。猶如虛空寂靜。而住。爾時世尊從禪定起。其心廣大如海汪洋。澄清映徹如淨瑠璃。普觀眾生若身若土。與諸如來平等不二。身相廓然。眾會皆覩。是時三千大千世界皆大振動。一切諸天。心大歡喜。離諸怖畏。於虛空中。雨天寶華。其華微妙。繽紛而下。又於空中。作天妓樂。種種歌詠。上妙音聲。琴瑟箏篴琵琶。笙簫。是諸樂器。不鼓自鳴。於是會中。以為供養。于時舍利弗從座而起。至世尊前。曲躬合掌。而白佛言。大悲世尊。如來所入智印三昧。而我等輩。無所覺知。各以神通。入自所得三摩地門。以智慧力。周遍推求。如來身色及與住處。查不可得。不能了知。是我等輩。先自所得三摩地門。及智慧力。狹劣短促。未得如來無相正智。自在法門。惟願世尊。大慈悲力。深加憐愍。與我等輩。而為開導。於佛知見。定慧法門。使令悟入。於無相境。任運現前。爾時佛告舍利弗。我入如是智印三摩地。非汝聲聞及諸緣覺。所得智慧之所了解。及能推求。唯佛與佛。乃能知之。何以故。如來色身。由無動心。離諸希求。捨分別緣。絕自他相。凝然湛寂。勝

智功力之所任持。大定如如。為一體相。若汝聲聞及諸緣覺。唯求自利。不樂利他。所證法門。及智慧境。未解融通。自他隔閡。空有互違。於佛如來法空。無相智印三昧。難解難入。是故汝等於佛身相及與住處。不可得見。亦不了知。佛說大乘智印經卷第一

### 佛說大乘智印經卷第二

西天三藏寶法大師賜紫沙門智吉祥等奉詔譯

爾時佛告舍利弗。諸佛如來。若身若心。所獲功德。難修難證。亦難悟入。何以故。舍利弗。諸佛如來。眼觀諸色。是識不以色境而動。耳聽諸聲。是識不以聲境而動。鼻嗅諸香。是識不以香境而動。舌嘗諸味。是識不以味境而動。身取諸觸。是識不以觸境而動。所以者何。識智自在。不於外境。妄計好醜。起愛憎故。舍利弗。諸佛如來。意緣諸法。勝智相應。了知所觀。無生非無生。是得最上無生。寂靜非寂靜。是得最上寂靜。禪定非禪定。是得最上禪定。律儀非律儀。是得最上律儀。戲論非戲論。是離最上戲論。分別非分別。是離最上分別。斷滅非斷滅。是得最上斷滅。舍利弗。諸佛如來。凡有所說。離諸虛妄。無不真實。義味充饒。止息諍論。心相平等。離諸異相。不平等法。能令聞者。除去惡欲。不生邪見。離邪思惟。舍利弗。諸佛如來。若於所證。無去無來。不常不斷。非空非有。離見離聞。無大小形。無方圓相。舍利弗。諸佛如來。於能證道。相性圓滿。智慧光明。遠離異

相。及非異相。無諸揀擇。及非揀擇。體若金剛。無破壞故。用如虛空。無取捨故。於勝善法。無所愛著。於廣大行。亦無怖畏。心相空寂。離論聞見。舍利弗。諸佛如來。於所安住。邊際勝定。清淨圓滿。不厭闡開。不樂空寂。於一切時。而常遊戲。於法非法。情器差別。悉能了悟。無不如境。定力堅固。縱遇惡緣。不可破壞。舍利弗。諸佛如來。於諸世間。尊貴富饒。一切樂境。如夢如幻。如棄遺跡。不依輔相。宰相官。大婆羅門。而有所求。是故不為名聞利養之所繫縛。舍利弗。諸佛如來。或有所聞。情非情聲。不緣此故。而生差別。無差別心。亦復遠離。舍利弗。諸佛如來。於諸所緣。決定境相。不生勝解。非勝解心。亦復遠離。舍利弗。諸佛如來。於諸時分。不計延促。有盡無盡。成壞差別。非差別心。亦復遠離。了知諸法。無言無說。離去來今。於心。心所。無有相應。無不相應。思惟計念。悉皆不生。無有此岸。無有彼岸。於諸情器。無上中下。深心堅固。不可破壞。舍利弗。諸佛如來。所有身相。無所動作。離諸事業。怨憎違戾。信向親厚。以平等慈。隱顯不二。由昔因中。離無邊障。修無邊行。於諸眾生。施大悲智。真實觀察。隨其所宜。具能饒益。令諸有情。應自所求。歡喜滿足。故於所得。身相智慧。唯自證知。餘無所解。於自身色。無有齊限。與虛空等。無有隱顯。周遍一切。勝功德力之所莊嚴。相好圓滿。無有缺減。於蘊處界中。無在無不在。於諸有情。所習事業。悉能棄捨。除方便智。示現修作。內心清淨。外色清淨。舍利弗。如上所說。皆是如來

若身若心勝善功德莊嚴之相周遍平等若以汝等分別之心欲見如來勝定任持所有身相是如來身不可得見爾時舍利弗重白佛言世尊云何如來色身圓滿得名無相云何智印三摩地周遍平等爾時世尊欲重宣此義而說偈言

如來身心相 由定智所生  
不假外境牽 識相分別動 意緣一切法  
與身無有異 離是非差別 所得為最上  
若以小智力 欲見善逝身 如月印晴空  
妄謂水中現 身相本微妙 復由勝定持  
離長短方圓 無去來住立 內心寂不動  
澄靜若虛空 息泯身心相 自然無所有  
以無所有心 不著香味觸 離諸蘊處界  
以此觀如來 如見水中月 雖不得真實  
既離分別心 是亦名為見 如來智印門  
非我獨能證 若大心眾生 希求無厭倦  
得最上所持 依此勝定力 於佛智印門  
亦當無所得 此經所生福 無盡如虛空  
我以方便智 少略而讚說 十方諸佛土  
百千酤舐剎 滿中諸珍寶 若人持供養  
時經無量劫 不如聞是經 書寫或受持  
是人所得福 比前行施者 復倍河沙數  
若人行慈心 饒益諸有情 不如依此經  
悟佛三摩地 若於眾生界 心常行忍辱  
不如彈指頃 修習殊勝定 其所生功德  
猶如須彌山 將以對微塵 大小莫為比  
若人行精進 勇猛為諸善 不如聞此經  
依教悟其理 所獲諸功德 百千萬億分  
若以共較量 比況不及一 若人修禪定

安住無量劫 坐臥若經行 周遍諸佛剎  
不如一時中 聞此經功德 若於塵沙劫  
能修習智慧 斷除煩惱纏 名聞普周遍  
不如剎那時 讚佛智印海 如以大海水  
比較於一滴 若欲觀佛者 須離諸名相  
了知諸法性 非空亦非有 若但了知空  
設如蘇部底 於佛智印門 亦無所悟入  
爾時世尊說是偈已告舍利弗如我所說如  
來智印三摩地法若諸菩薩能於十方諸佛  
世界為欲圓滿無礙智慧應當修學是三昧  
地晝夜精進身心安住而不散亂亦不懈廢  
舍利弗如是菩薩摩訶薩若欲願見十方世  
界諸佛國土一切如來悉皆能見舍利弗此三  
摩地是菩薩摩訶薩無量無邊最勝法門甚  
深法眼而於諸法得無障礙通達了知無所  
忘失是名如來最勝總持陀羅尼門若諸菩  
薩心欲圓滿一切說相為欲成就無上菩提  
微妙體性應當志心精勤修學是三摩地智  
印法門若諸菩薩隨欲遠離諸惡業行無諸  
障礙成就最上清淨之法以智慧力摧伏怨  
魔遠離不善諸相等如如來智無諸染穢  
諸業障盡清淨無垢安住如來究竟智地能  
使諸惡一切魔怨咸皆止息無所退動覺智  
明了知彼一切諸眾生等種種分別愛樂境  
相善不善業因果差別了知一切諸眾生等意  
地微細煩惱結縛善能知彼解諸有情一切  
縛法應當修學如來所說方便最上勝三摩  
地智印法門若諸菩薩欲令眾生志樂堅固  
心欲思惟求無上法應當精勤修習如是三

摩地門自然成就無上勝法若諸菩薩意欲  
宣說諸佛如來應諸有情種種根病對治等  
法應當精勤修習如是三摩地門自然於法  
分別演說無有障礙若諸菩薩心欲於彼三  
乘聖法分別曉悟真俗諦相甚深法義應當  
精勤修習如是三摩地門自然於法智慧明  
了不生闇鈍若諸菩薩欲於酤舐百千劫數  
了悟生滅幻化不堅能證諸法真實自性清  
淨解脫應當精勤修習如是勝三摩地若諸  
菩薩欲於生滅十二因緣無明為始發生業  
行招集苦報貪染執著愛欲增盛假有聚成  
生死病相變易無常流轉諸趣於生滅因而  
自覺悟應當精勤修習如是勝三摩地若諸  
菩薩欲了一切雜類有情起見造業報相差  
別心識明昧正念顛倒異分有情如實了知  
根性利鈍方便教示漸令悟入真實正法住  
信行地應當精勤修習如是勝三摩地若諸  
菩薩意樂成就諸佛國土清淨業因純善境  
界身心寂靜眷屬調順遠離嫉妬憍慢過失  
親近恭敬平等愛樂無怨憎想應當精勤修  
習如是勝三摩地若諸菩薩意欲發萌自身  
智慧勝妙光明照曜自他生死黑暗愚癡重  
障斷三界惑滅諸苦報自在解脫應當精勤  
修習如是勝三摩地若諸菩薩欲知十方所  
有世界一切有情死此生彼壽命延促所經  
長劫及以剎那生滅分限定由先業招引勢力  
所感如是自類果報如實了知前後決定壽  
命根本應當精勤修習如是勝三摩地若諸  
菩薩欲知聲聞及辟支迦菩薩如來從自因

地所行妙行。於四聖諦斷滅修證。十二因緣逆順觀察。寂然自覺微妙甚深。十到彼岸清淨因行。各各獲得究竟果報。應當精勤修習。如是勝三摩地。若諸菩薩欲於一切語言音聲角論辯捷。應時訓對不踈不謬。方便善巧。於諸世俗及以勝義。顯示明了。令人易解。不生疑惑。印證決定。應當精勤修習。如是勝三摩地。若諸菩薩意欲了知佛法正因。三乘善行方便隨順。根本差別有上中下。稱性悟入。菩薩因地。漸以熏修。植諸善本。得如來智。應當精勤修習。如是勝三摩地。若諸菩薩意欲成就諸佛如來圓滿覺智。不起分別現種種身。以平等慈任運攝受一切有情。令各生起歡喜愛樂。修學菩薩心地行願。應當精勤修習。如是勝三摩地。舍利弗。如我所說三摩地法。是為最勝。如摩尼珠。一切有情凡所樂欲。悉得如意。無不滿足。舍利弗。若諸菩薩摩訶薩等。得此如來三摩地法。一切所須諸法。聖財及微妙行。悉得如意。行願圓滿。是故應當精勤修學。爾時世尊欲重宣此義。而說偈言。

如來所有智 最上更無等 隨性相差別  
一切皆能證 平等智光明 普照諸縛著  
能入智慧門 得無量自在 智相及智性  
能印證諸法 分別諸善惡 及世俗勝義  
曉了如是法 智慧無有盡 譬如大明日  
光照於三界 普於諸幽暗 一切皆破壞  
成就平等法 是真實聖智 一切三摩地  
皆從智印出 名為諸佛種 亦名大摩尼  
利益諸有情 亦如世間人 有最勝珍寶

財富無有盡 濟諸貧乏者 皆令得充足  
法財施眾生 亦復無有盡 神通及智慧  
最勝妙法門 皆從三摩地 智印寶所生  
譬如諸國土 有大摩尼珠 諸王皆愛樂  
臣佐普護持 如是摩尼寶 諸寶無有上  
我說智印寶 殊勝最第一 總持智光明  
破壞於諸見 境界悉明了 遠離諸冥暗  
安住寂靜心 不分別好醜 修清淨智慧  
財法無窮盡 貪染無所著 無六十二見  
正念悉平等 入甘露法門 速得如來智  
成就相好身 具足三十二 得最勝菩提  
等一切佛覺 妙智已圓明 到菩提彼岸  
證涅槃自性 具自他圓滿 功德悉成就  
無量無邊際 甚深微妙法 總持陀羅尼  
解脫常寂靜 能具足十力 又以大願海  
布施波羅蜜 持戒及忍辱 精進與禪定  
智慧常堅固 安住六度中 長時無間斷  
無有諸怖畏 離煩惱苦業 魔羅與眷屬  
不能得其便 能引導眾生 不捨於正法  
漸入如來家 得遊智印門 能於賢劫中  
及十方世界 一切諸佛會 親近皆隨喜  
是名真佛子 無有能破壞 若有信解人  
能書寫此經 或讀誦受持 愛樂廣流布  
長時無懈倦 於義味明了 當知如是經  
三世諸佛母 出生智印寶 如來功德藏

佛說大乘智印經卷第二

佛說大乘智印經卷第三

爾時會中復有菟伽沙那庾多數一切菩薩。聞佛如來說是三摩地。離諸障礙。心得解脫。於陀羅尼祕密深法。隨意悟入。印證明了。決定住持。復有六十八那庾多菩薩。於百千劫已修習禪定解脫。離諸妄想生死怖畏。常樂熏修微妙勝行。聞此最上三摩地法。心懷踴躍。於阿耨多羅三藐三菩提得不退轉。證陀羅尼音聲辯才。得無礙解。復有六十億諸天及人。聞佛所說智印法門。歡喜無量。恭敬讚歎禮拜供養。而於阿耨多羅三藐三菩提心生愛樂。於三摩地甚深勝法。無有疑惑。咸生信解。於菩提心堅固不捨。於智印門勇猛精進。由大願力修諸善本。根性成熟。便得住於阿惟越致。信受如來所行行願。心意決定。無諸退屈。于時世尊知彼善根因緣純熟。欲授其記。告諸菩薩言。善哉善哉。汝等從此過三十億劫。各各於諸佛國土。具足修習六波羅蜜。所有難行最勝行願。一切皆能圓滿成就。種習俱盡。得大菩提。皆當作佛。悉同一號。名無畏如來。汝天人眾諸善男子。已於過去無量佛所。植眾善本。信樂大乘。今於此會得聞如是微妙甚深希有之法。欣樂受持。諸善男子。汝等從此過億千劫。同得作佛。皆同智印如來。爾時世尊為此菩薩及天人眾授佛記已。普觀眾會。以柔軟音語妙吉祥童真菩薩言。我觀此會菩薩天人。雖各於彼最上菩提發堅固心。勇猛不退。未能於彼末世邪見道中。建立正法。唯汝能於三千世界五濁惡時。利益安樂一切眾生。方便守護。分別演說。於

一切處廣令流布。使離虛妄及諸愛染。不為名譽之所縛著。爾時妙吉祥童真菩薩從座而起。端容整服。右膝著地。胡跪合掌。頂禮世尊。持種種華。以為供養。瞻仰讚歎。得未曾有。而白佛言。善哉世尊。如我觀察一切諸法。皆不可得。而我願樂守護。無上正等菩提。及願樂心。亦不可取。世尊。此菩提道。性離分別。非在內外中間。無見無聞。非取非捨。圓滿寂靜。不可相求。離戲論故。是時會中復有三百酤毗菩薩。從座而起。頭面作禮。恭敬讚歎。而白佛言。我等亦當守護世尊。無量阿僧祇那庾多酤毗數劫。所得阿耨多羅三藐三菩提。祕密甚深難解之法。於未來世。方便為人。受持讀誦。敷繹妙義。書寫恭敬供養。于時一切菩薩。作是語已。各各脫身。所著上衣。而用供養。發是願。竟退坐一面。爾時世尊告彌勒菩薩摩訶薩言。汝能具足廣大慈悲。於後末世。若諸眾生。不樂正法。於是時護持此法。令諸眾生。不生邪見。爾時彌勒菩薩摩訶薩。於世尊前。頭面作禮。而白佛言。我當願於五濁惡世。方便守護。是三摩地。令不斷絕。使諸邪見散亂眾生。漸次悟入摩訶衍。曩最勝妙法。世尊復告彌勒菩薩言。今此會中三百八十酤毗菩薩。安住是法。信解受持。心生願樂。精進修學。誓不退捨。復有菩薩。心未堅固。而於是法。不能受持。亦不愛樂。於後末世。五濁劫中。不能護持。如來無量阿僧祇劫。多酤毗劫。數所修阿耨多羅三藐三菩提法。於是法中。轉生諍訟及諸煩惱。不能任持愛樂修學。彌

勒菩薩復白佛言。世尊。云何菩薩而不愛樂最上勝法。若有菩薩。意欲修習如是法行。發幾種心。而能成就。爾時世尊告彌勒菩薩言。諦聽諦聽。善男子。由諸菩薩。俱生我法愚癡。闇鈍。以為障礙。雖有智慧。而不了了。故於菩提。無決定心。數數退捨。多不愛樂。若有菩薩。欲於如是勝三摩地。智印上乘。堅固趣求。意樂證入。應於菩提。發七種心。云何七種。一者如佛世尊。往昔因地。訪善知識。不惜身命。為求佛道。發菩提心。二者於諸微妙一切勝法。愛樂修學。專心守護。為如是等發菩提心。三者現諸有情。有種種苦。晝夜憂惱。無解脫時。起大悲心。普欲救拔。為如是等發菩提心。四者普欲利益一切眾生。無怨親想。皆得快樂。自在解脫。為如是等發菩提心。五者普於一切諸眾生等。歡喜布施。方便攝受。令離怖畏。於如來法。不生怯弱。為如是等發菩提心。六者見諸菩薩。發菩提心。而生欣樂。親近修學。同諸菩薩。發菩提心。七者為聞如來身相殊勝功德。圓滿第一清淨。為求出世無垢聖果。發菩提心。善男子。如是菩薩。發此七種最勝妙心。能於無上正等正覺。漸次成就。不捨眾生。守護正法。是名七種發菩提心。善男子。若諸菩薩。善能修習四無量心。學佛如來甚深法藏。復能成就五種勝法。是諸菩薩。具足名曰阿惟越致。彌勒菩薩復白佛言。世尊。云何五法。得不退轉。善男子。一者於諸眾生。起平等心。於自眷屬。不生親昵。於他有情。亦不厭捨。二者見諸有情。而得利養。深生歡喜。善言

讚美。不生憎嫉煩惱之心。三者於佛如來。微妙勝法。意願聽聞。及欲宣說。為欲護持如是法藏。不惜身命。廣布流通。相續不斷。四者所有資生種種財寶。無有慳吝。悉能惠施。一切有情。及以上妙飲食湯藥。平等普濟。皆令充足。五者於諸如來。所得最上勝功德法。廣大智慧。祕密總持。歡喜愛樂。精勤修學。是為菩薩五種勝法。應當於此。決定趣求。心不退轉。佛告彌勒菩薩摩訶薩。復有五法。其性剛強。能障菩提。不得解脫。云何五法。一者於三乘法。不能解了。二者貪求利養。而無厭足。三者常懷慳惜。不能惠捨。四者諂曲不實。無時間斷。五者口但談空。不了諸相。彌勒菩薩如是五法。慣習剛強。覆障菩提。不能成就。無上聖果。復有五法。若諸菩薩。而能具足。即於如來所說勝法。開導演說。堅固修習。入聖性地。如是菩薩。名為阿惟越致。云何五法。一者無我。遠離相縛。不執自他。二者無法。遠離封著。世俗勝義。軌持自性。三者智性。智相平等不二。無諸憎愛。寂靜湛然。四者不著菩提。及與眾生。不愚善惡。因果漸次。五者了知如來功德。色身神通。變化成道。入滅差別之相。善男子。如是五法。具足了知。名阿惟越致。能成無上正等正覺。爾時世尊而說偈言。

無智眾生類 妄說法非法 論世俗語言  
 研求於好醜 自身口意業 而不能守護  
 專意修習者 愛樂於寂靜 行持戒忍辱  
 言語常柔軟 能護持菩提 如犀樂獨處  
 捨離於闇闇 常樂居空寂 如鹿在深山

悉無諸怖畏 如是修行者 如風無所著  
為護持深法 能捨於身命 其心無所欲  
動靜與施為 咸皆為饒益 智慧常明敏  
不愚諸境相 後五濁惡世 無信諸有情  
不能受是法 觸處生疑惑 無所能覺了  
妄行於邪行 狂亂心顛倒 如是愚癡人  
於此菩提法 而不能守護 亦不樂修習  
我念過去世 於燈明佛所 聞是三摩地  
而發意修習 復過於百千 酤舐劫數已  
復有佛出世 號名曰髻幢 為無量眾生  
說此三摩地 第一會說法 而有八十億  
那庾多菩薩 心得不退轉 第二會眾數  
七十那庾多 第三會說法 復有七十三  
那庾多菩薩 皆住不退地 其佛壽長遠  
身所出光明 廣六十由旬 復有比丘僧  
九百千酤舐 遠離諸苦縛 皆得阿羅漢  
時有轉輪王 號名曰福上 統領閭浮提  
地里計其數 七百千由旬 王者四天下  
嬪妃及嫫女 其數六酤舐 而有千王子  
諸相悉具足 其土號光慧 人民皆快樂  
有八百酤舐 諸城及園苑 上妙眾華果  
種種皆嚴好 摩尼寶莊嚴 如諸天境相  
爾時轉輪王 而於睡夢中 間有佛出世  
其名曰髻幢 於是夢覺已 尋將所領眾  
臣佐及人民 百六十酤舐 而來至佛所  
為聞三摩地 時王聞是經 甚深真實法  
心生大歡喜 即以諸國土 咸皆施於佛  
而以為供養 於一切國土 用上妙梅檀  
各起諸精舍 園林皆具足 金銀諸珍寶

種種而嚴飾 如是供養佛 經於八萬歲  
安住佛法中 能遠離諸惡 於情及非情  
常興修勝善 棄捨諸愛樂 深心無所欲  
唯以真實語 化利諸眷屬 而於一日中  
所伸諸供養 其數無有邊 如是供養佛  
為求三摩地 得名生佛家 是最上真實  
甚深微妙法 非住相能求 非妄心所得  
而此三摩地 名如來智印 時王聞是法  
棄國而出家 經於八萬歲 常習三摩地  
而於晝夜中 未曾有懈怠 佛於長時中  
說法廣開悟 是髻幢如來 後入般涅槃  
王造窣覩波 六十四酤舐 一一窣覩波  
各五百傘蓋 七寶以莊嚴 及諸眾妓樂  
然百千香燈 光明普照曜 種種供養具  
皆悉廣嚴備 積累計其數 七萬三千歲  
復為諸眾生 說是三摩地 無相殊勝法  
其心無所住 若為人恭敬 供養讚歎者  
心亦不生喜 遠離諸有相 及以諸呪術  
常護持正法 經八千酤舐 七十那庾多  
安住如來法 寂然常快樂 於一切學處  
而無不具足 成就菩提法 三業悉清淨  
於諸已受學 繫心無間斷 於所未學法  
精進勤修習 以大智慧力 及勝解印持  
思惟常憶念 而無有忘失 遠離諸戲論  
及以諸異想 非如惡世中 妄行菩提行  
雖教化有情 貪求於名譽 為利養說法  
安住諸有相 言一切皆空 實不了空性  
是即名為著 悟心與說異 邪命不清淨  
及行於非法 口但能談空 心為相所縛

若修如是行 究竟無所得 時福上輪王  
即今安樂國 無量壽佛是 爾時王千子  
今此賢劫中 千佛世尊是 今此大會中  
我前聽法者 時同王出家 為比丘者是  
憶念於往昔 酤舐那庾多 一切佛法中  
出家聞正法 聞悉能解了 由是無量劫  
行種種方便 供養於諸法 不著菩提相  
安住實際中 得見燈明佛 福智皆平等  
如為我授記 未來世成佛 號名曰釋迦  
佛說大乘智印經卷第三

佛說大乘智印經卷第四

第五  
同卷

西天三藏寶法大師賜紫沙門智吉祥等奉詔譯

爾時會中有頻婆娑王其王夫人名賢吉祥  
亦名酤舐金光阿闍世王是彼所生從座而  
起五體投地禮如來足如是禮已雙膝踞地  
長跪合掌色相怡悅以妙音聲讚歎佛德復  
以百千無價眾寶微妙衣服奉上世尊以為  
供養復以五百七寶之華散虛空中成華雲  
蓋遍覆眾會時賢吉祥作是種種諸供養已  
而白佛言世尊我念未來濁惡世中諸有情  
類信根薄弱煩惱增多我願於彼信解受持  
此三摩地最勝法門若見有人書寫受持聽  
聞讀誦為人演說開示導化展轉流通使不  
斷絕普令見聞而生信解精進修習如是之  
人名為法器我當於彼受持之者歡喜讚歎  
親近承事供給所須飲食衣服臥具醫藥諸  
供養具令無歉乏復以大乘甚深之法更令

悟入。令彼所住大乘種性。速得成熟於阿耨多羅三藐三菩提法。不妄分別。是空不空。了知諸法離言執故。隨悟隨學。不生戲論。為護正法於諸生命。無所吝惜。況復世間資生之物。增益煩惱生死之具。唯當修學如是殊勝三摩地法。作是語已。退坐一面。時頻婆娑王後宮八千婁女。聞如是說。各各發起阿耨多羅三藐三菩提心。而皆願樂無上大乘。欲學安住如是殊勝三摩地門。各從座起。合掌恭敬。頭面作禮。而白佛言。世尊。我等咸當於後未來末世之中。受持如是甚深圓滿微妙之法。及願守護供養受持之者。時摩竭國烏波索迦烏波斯迦六十萬眾。見是事已。咸皆歡喜。亦各發起阿耨多羅三藐三菩提心。於此智印三摩地法。深心隨喜。作是願言。我等亦願於後未來濁惡世中。於是妙法圓滿護持。爾時世尊知彼摩竭陀國烏波索迦烏波斯迦。并賢吉祥酤毗金光夫人。與後宮婁女八千人等。心口所願。信解受持如是妙法。長時修習。無間無斷。知諸佛果從此法生。示現歡喜。忻然微笑。緣是笑故。有百千種微妙色光。從佛口出。所謂青黃赤白及頗胝迦種種色。相普遍世界。其中眾生觀此光明離諸驚怖。摧伏一切煩惱魔怨。其光上照至有頂天。日月光明所不照處。悉皆通徹。下至一切諸大地獄。及諸惡趣。苦惱休息。穢惡悉除。皆得清淨。其光迴旋還至佛所。右繞千匝。覆世尊頂。隱而不現。爾時賢吉祥酤毗金光夫人。見是光已。不知如來放光義利。復從座起。整肅衣容。恭敬合掌。雙膝長跪。頂禮世尊。精勤三業。讚歎佛德。而說偈言。

佛德差別無邊際  
如華開敷正芬芳  
佛心平等離憂喜  
我今仰測笑因緣  
具足安樂十力尊  
所說言辭義味豐  
法如一雨無差別  
梵音清徹福無邊  
由是聞法勝因緣  
願佛為作師子吼  
眾生聞法皆悅可  
自他見聞及受持  
由茲開發菩提心  
八種圓滿無漏音  
一切說法功德中  
令諸受化諸有情  
不為煩惱憊其心  
受持禁戒眾律儀  
遠離塵勞無眾苦  
於此菩提勝行中  
佛身猶如妙金山  
蓮華出水正開敷  
如師子王遊戲時  
惟願演是笑因緣  
佛於諸法得自在  
令差別性諸有情  
不捨眾生常護持

三界最勝無與等  
似月印空已圓滿  
云何今者現微笑  
應當演說微妙法  
處眾猶如星中月  
為諸世界眾生眼  
隨諸根性令生解  
凡在聽聞皆歡喜  
得未曾有諸快樂  
蠲除種種諸報業  
隨喜平等諸義味  
應根應時能解了  
悉於所聞生尊重  
普應無邊諸性欲  
相應諸數無違背  
悟入聞持心堅固  
使於所得無退轉  
縱遇違緣悉能忍  
身心安住寂滅樂  
思惟修作常精進  
亦如寶塔光明聚  
凡是見聞悉瞻仰  
吼大音聲伏眾獸  
令我眾會除疑惑  
契合無相真實理  
各各三業淨無垢  
令轉善因獲勝果

十方世界諸眾生  
摧伏一切煩惱熱  
如來所有說法聲  
琵琶笙笛及角貝  
桴擊鍵椎及鐃鈸  
命命頻伽及鸚鵡  
佛發微妙柔軟音  
此十方眾來集會  
惟願方便隨宜說  
咸使悛革不善心  
彼從酤毗剎土來  
願今領悟正法音  
惟願世尊雨法雨  
冀能圓滿無漏音  
爾時世尊聞是賢吉祥酤毗金光夫人說是偈已。復於眾會而說偈言。

我於無量世 殞伽沙劫中 時有大法王  
名無相福光 佛壽極長遠 七十六酤毗  
化諸四天下 彼土聲聞眾 其數無有量  
以智印法門 引導眾生類 時有轉輪王  
號名曰勝慧 王有二夫人 一名曰帝幢  
其次號日光 聞是智印門 晝夜常精進  
勤修諸善業 於一酤毗年 護持正法眼  
經六十酤毗 為師導眾類 已於三十億  
無量諸佛所 積集諸功德 無量世界中  
法眼常救護 三十殞伽沙 未來世諸佛  
於彼彼世間 平等普護持 如是正法眼  
皆令不斷絕 時彼勝慧王 今阿閼佛是  
彼會清淨眾 夫人與眷屬 各各同俱生

如是佛國土 護法心不怠 復於後後時  
轉彼女人身 得成於男子 即生於無量  
安樂佛世界 如今末世中 唯汝賢吉祥  
能護如來法 任持不破壞 應以菩提心  
普遍諸佛剎 正法欲盡時 一切皆救護  
使彼覺法人 同生安樂國 坐千葉蓮華  
得諸佛相好 莊嚴皆具足 既生彼土已  
復供養諸佛 末後當次第 於彼莊嚴劫  
得成無上道 以阿耨菩提 轉授諸人天  
令發無上心 同守護正法 彼土離魔怨  
及以三毒業 不生諸罪戾 諸惡悉無有  
不處於胎臟 清淨而化生 與無數菩薩  
皆集於此會 無有諸聲聞 亦不聞名字  
遠離諸惡緣 常修菩提行 捨名聞利養  
不戀著親昵 捐棄身命財 饒益有情類  
方便為說法 普令生信解 若有能修習  
佛無上菩提 安住此法中 不求世間樂  
如說而修行 普遍諸佛土 常生恭敬心  
護持諸佛法 有懷嫉妬者 應當密護持  
以大憐憫心 教誡諸有情 令如是修學  
咸離諸苦厄 如我往昔時 為求菩提故  
於酤舐劫中 捨頭目髓腦 珍寶及妻兒  
一切無愛戀 若於我法中 不能生諦信  
雖剃髮染衣 愚忘真實相 貪求名譽財  
為利養說法 親近不律儀 廢受持讀誦  
雖欲學沙門 有失沙門行 佛說是語時  
是會人天眾 有八十酤舐 咸生悲憫心  
念彼如是人 當沈淪惡趣 同作如是言  
我願於未來 以菩提心力 平等普護持

作如是語已 三千大千界 悉皆大震動  
諸天雨眾華 於是國土中 荊棘及便穢  
以此勝因緣 一切皆除滅 無異於諸天  
周遍悉清淨 於未來世中 有人聞如是  
摩訶衍曩者 得最勝慧命 十方天人眾  
歡喜咸恭敬 讚歎大乘經 種種諸妙義  
一切諸龍王 夜叉羅剎眾 捨除毒惡心  
皆恭敬供養 若末世有情 得聞此最上  
甚深智印經 而能信解者 其人所得福  
今略為譬喻 如似旃伽沙 為佛國土數  
滿中盛珍寶 悉施供養佛 修如是勝行  
過旃伽沙劫 其所得功德 不如聞於此  
無上智印門 開導復演說 所獲過於彼  
無量無邊數 是福無形相 非有為心知  
若因聞佛說 微妙智印法 發生菩提心  
與諸法相應 依佛所宣說 如說而修行  
又於末世中 勤觀察護念 樂於空寂處  
一心求解脫 積集無數量 勝善諸功德  
常以三種戒 教授諸有情 愛護憐憫心  
如母念其子 歡喜柔軟音 教令離怨賊  
於佛正法中 不生顛倒想 自他皆饒益  
速令至正覺 若於三摩地 廣大智印門  
能書寫受持 讀誦正開演 展轉授眾生  
自他得開解 亦令俱獲得 勝善諸果報  
言議與思惟 皆悉不能及 是人咸得生  
諸佛安樂國 世尊見彼已 而生親善想  
憐憫心護持 歡喜而攝受  
爾時彌勒菩薩摩訶薩白佛言世尊有幾乘  
性人而能受持此三摩地智印法門於彼未

來世之中護持正法於是正法而生愛樂能  
於如來祕密甚深智印法門而生信解好樂  
修行于時世尊語彌勒菩薩摩訶薩言彼五  
濁時惡世眾生諸苦逼惱不可稱數唯有菩  
薩於此惡世荷負正法而生信解如是之人  
甚為希有而彼末世諸眾生等常聞鬪諍妄  
言綺語或壞善根於此智印最勝法門所有  
言說不能解了唯有菩薩於是五濁惡世之  
中法欲滅時於苦眾生慈念憐憫以諸方便  
饒益攝受如是諸人苦惱所逼若無菩薩接  
化引導即於深法不能信解受持讀誦於是  
彌勒菩薩摩訶薩白佛言善哉世尊意為憐  
憫安樂有情宣說如是甘露妙法令彼未來  
一切眾生得是義利生悲感心愛樂修習若  
彼菩薩得是法門隨順如來最上勝行堅固  
趣求無有破壞無上道心速能證得阿耨多  
羅三藐三菩提契佛道中相應勝行而不退  
捨爾時世尊復語彌勒菩薩摩訶薩言若有  
菩薩已於往昔百世尊所親近恭敬承事供  
養發菩提心種種善根植眾德本於彼未來  
濁惡世中於此廣大無上菩提甚深妙義未  
能信解於此廣大智印法門不能悟入復次  
彌勒若有菩薩於往昔中千世尊所發菩提  
心親近恭敬種種善根植種德本如是菩薩  
於彼未來五濁世中雖遇善友發菩提心而  
於廣大智印法門微妙義理未能悟解數起  
疑惑不生愛樂不能受持讀誦書寫流通亦  
復不能為人演說令生信解復次彌勒復有  
菩薩於往昔中經百千佛發菩提心種諸善

根植眾德本。於彼未來濁惡世中。雖遇善友發菩提心。於此廣大甚深最上智印法門。信解微劣。於深遠義未能悟入。亦復不能受持讀誦。為人稱讚及與講說。如是無上廣大菩提甚深義利。復次彌勒。若有菩薩乃至往昔於一剎那佛所發菩提心。種諸善根植眾德本。彼於未來末世之中。雖遇善友發菩提心。於此廣大微妙最勝智印法門。雖復聽聞書寫讀誦好樂受持。於甚深義未能解了。不能為人分別解說。於第一義大菩提心未能印定。於此智印三摩地門無所了悟。復次彌勒。若有菩薩於彼往昔三十剎那諸世尊所發菩提心。種諸善根植眾德本。彼於未來末世之中。雖遇善友發菩提心。聞此廣大智印法門。亦能聽聞讀誦受持。書寫流通為人演說。然於智印三摩地法。無決定心任持印可。不能成就真實義利。復次彌勒。若有菩薩於八十剎那諸世尊所。聞此最上三摩地法如說修行。復能化利諸有情類。悉令信受。於是佛所發菩提心。種諸善根植眾德本。於彼未來末世之中。菩提心力聞是廣大甚深智印無上法門。而能解了受持讀誦。書寫流通為人解說。深心愛樂堪任護持。令速圓滿。於是微妙三摩地門正解了已。於一切法悉皆通達。復於無上菩提廣大法中離諸分別。摧伏一切諸惡魔怨。破壞一切不善業障。無量劫中隨有所造諸苦因行。於未來世當受報者皆得解脫。又於往昔造不善因。至後惡世法欲滅時。善心微劣破壞正法。樂著外道世俗言教。

增長戲論行非法行。出無義言不擇高下多所貪求。諸惡有情見不恭敬輕慢凌辱。於自所須一切乏少。如是苦因。由此一生證悟勝法大功德力皆得除滅。復由往昔親近供養。如上所說一切諸佛所集善根。於彼未來末世之中發菩提心。而能任持是三摩地最勝法門。離諸苦縛得不退轉。三業堅固不生散亂。精進趣求菩提聖果。復次彌勒。若諸菩薩於往昔中。造不善業應墮惡道。於彼未來末世之中法欲滅時。聞是法門好樂受持。以是因緣。或以病苦怖畏交煎。先世罪業即得除滅。諸根不具受諸苦惱。生邪見家顛愚聚會。生下賤家為人所使。生貧窮家衣食歉乏。生慳貪家不能拯濟。若有所說人不信受。王法所加怨敵會遇。親知厭棄心多憂惱。慈悲法會而多障阻。縱欲說法人不樂聞。所欲資生飲食衣服臥具醫藥。及看視人不逢惠施。貧窮親附豪富棄捐或被惡人來相嫉亂憎嫉殘害。所修善法不能增長。或於夢中見諸惡相。以是輕微諸苦逼迫。先世罪業即得消滅。業障滅已。設遇苦緣及諸怨賊不能為害。與魔相隨。雖不遠離而能了知諸魔境界。於諸名聞及與利養心不愛樂。為人親近及以恭敬尊重讚歎不以為喜。修諸善行惠施有情。不生慳吝而求解脫。守護尸羅無所毀壞。修忍辱行饒益有情拔苦與樂。修精進行策勵三業。勤求眾善離諸惡欲。修習禪定散亂不生。以大智慧悟諸法性。方便願力利樂有情。聞無量法心無忘失。修種種善為利有情。於世

樂果不生希望。令諸眾生速登彼岸。復次彌勒。彼諸菩薩曾於往昔百世尊所發菩提心。真實平等種種善根。植眾德本離諸苦縛。由為末世諸惡眾生而來惱害。不能於此信解修習。何況末世諸惡眾生不種善根迷惑散亂而能覺悟。是故末世諸不善人。於此最勝甚深之法。不能信受如理修學。復次彌勒。若諸菩薩能於是法深生信解。志意堅固被忍辱鎖。降伏諸魔長時修行。保護任持不生退屈。廣大智慧無量善法從此法生。一心希求無上菩提。念念相應堅固不捨。復於未來敷演妙義精進不倦。究竟護持是三摩地最上法門。了達一切善惡事業。安住法中勤修眾行。

佛說大乘智印經卷第四

### 佛說大乘智印經卷第五

西天三藏實法大師賜紫沙門智吉祥等奉詔譯

爾時歡喜王菩薩。彌勒菩薩。妙吉祥菩薩。并六十不可思議菩薩摩訶薩等。在大眾中而為上首。合掌恭敬咸白佛言。大悲世尊。我等今者得聞如是微妙勝法。於彼未來堅固守護。教諸眾生發無上慧。於此勝法如說而行。遠離諸惡不生憍慢亦不貢高。無有諂曲愛憎之心。於彼自他怨親之境悉皆平等。於諸如來無數剎那百千萬億那由他劫。所得無上大法總持智印法要。愛樂受持書寫讀誦。乃至展轉相續流通而無間斷。于時世尊聞是歡喜王菩薩。彌勒菩薩。妙吉祥菩薩。并六

十不可思議菩薩摩訶薩等。發生無上護正法心。安樂眾生利益語已。於大眾中以清淨音而說偈言。

種諸善根離諂慢  
深忍堅固不動搖  
如是安住具大力  
離諸惡行無過患  
無有諍訟離染著  
如是之人能守護  
深忍堅固樂菩提  
守護威儀離諸惡  
世間一切諸財寶  
悉皆厭捨離諸著  
如是之人得成就  
於晝夜中勤精進  
尊重恭敬於善友  
能解世間無盡法  
印忍諸法心清淨  
智慧光明破諸暗  
是人智解離諸著  
與大雪山等堅厚  
亦如釋梵轉輪王  
亦名無上大醫王  
盡諸業障心清淨  
漸次成就他心智  
憶念過去那庾劫  
此人善逝所稱讚  
能入如來智印門  
了達名相無自性

寂靜安住無諸惡  
常正憶念於勝慧  
而能守護法財聚  
不為名聞與利養  
普皆平等如虛空  
漸次得成此三昧  
晝夜精進無懈怠  
於甚深法而增長  
眷屬親姻無所愛  
無怨親想心平等  
無上大寶三摩地  
能於是法生覺悟  
歡喜稱讚是三昧  
故於染境無所著  
如百酤抵日光照  
能入如是深法義  
猶如日月處虛空  
鎮壓大地能莊嚴  
有大威儀人恭敬  
能除種種諸病苦  
摧破魔羅諸眷屬  
了別種種差別心  
滅除煩惱熾盛火  
證悟菩提真空理  
獲諸無邊諸寶藏  
不著空有處中道

觀察五蘊如塵幻  
一切有為皆生滅  
勝智三昧性寂靜  
湛然三世本自如  
若見末世邪見人  
又復於此無所證  
是各增長眾生見  
復見有人隨順學  
又復末世諸釋種  
為求菩提而出家  
破戒破見毀威儀  
為貪利養及資生  
如渡大海失浮囊  
其有上乘真釋子  
猶如蓮華出淤泥  
我今教汝歡喜王  
摧伏妄想生真智  
精進修學無懈怠  
譬如世間穀麥種  
以此種子致良田  
所得子實莫可量  
如是展轉盡東方  
乃至十方佛國土  
如是一種為一佛  
一頭而現於百舌  
於彼殑伽沙劫中  
如將芥子等須彌  
或以毛頭一滴水  
如是功德共較量

印證四大體非真  
妄心造作成輪迴  
離諸分別難思議  
無去無來無所動  
於佛法著空有  
自言我得法性空  
世世遠離菩提心  
涕淚悲泣身毛舉  
具諸衰損無威儀  
於彼菩提不安住  
晝夜親近不善人  
所得還將利親族  
是必遙觀彼岸遠  
棄捨如是諸世間  
本性清淨無所染  
應當正念常守護  
於此希求具眾德  
是即名為諸佛子  
數如河沙那庾多  
展轉相生無量劫  
算數譬喻尚不及  
河沙數種亦如是  
所種子實無差別  
一佛設復有百頭  
共讚如來三摩地  
亦復宣說不能盡  
又如纖草敵空界  
用對無涯四大海  
譬如算數不能及

應當於此甚深經 長時精進而修學  
爾時歡喜王菩薩。彌勒菩薩。妙吉祥菩薩。并六十不可思議菩薩摩訶薩等。聞佛世尊說是偈已。發起堅固大菩提心。踊躍精進。復白佛言。大悲世尊。所有第一義諦最勝涅槃甚深法義。我等眾會雖生信心。未能深解。惟願世尊為我等輩分別解說。于時世尊以一圓音。語歡喜王菩薩。彌勒菩薩。妙吉祥菩薩。并六十不可思議菩薩摩訶薩等。言。善男子。如是勝法本來寂靜。離諸分別。絕諸戲論。假有名言顯示宣說。諸菩薩言。大悲世尊。云何此法離諸分別。絕諸戲論。假有言說。方便顯示。佛告善男子。如是勝法雖有言說。體不可得。故無分別。云何此法體不可得。以是勝法無修無作。故不可得。云何此法無修無作。以是勝法本無生滅。故非修作。云何此法無有生滅。以是勝法性離所取。亦非能取。故無生滅。云何此法無能所取。以是勝法無住無處。云何此法而無住處。以是勝法無變易相。故無住處。云何此法無變易相。以是勝法無彼無此。故無變易。云何此法無彼無此。以是勝法非有為亦非無為。故云何此法非有為亦非無為。以是勝法非虛非實。故云何此法非虛非實。以是勝法非心亦非非心。故云何此法非心亦非非心。以是勝法不可了別。故云何此法不可了別。以是勝法無有識變。故云何此法無有識變。以是勝法非相應。非不相應。故云何此法非相應。非不相應。以是勝法自性平等。故云何此法自性平等。以是勝法不可相求。故云

何此法不可相求。以是勝法無安住相故。云何此法無安住相。以是勝法無有自相故。云何此法無有自相。以是勝法本性空寂故。云何此法本性空寂。以是勝法無染著故。云何此法無染著。以是勝法離彼言說清淨故。善男子。由是勝法離諸分別無修無作。乃至離彼言說。性清淨故名為涅槃。爾時歡喜王菩薩。彌勒菩薩。妙吉祥菩薩。并六十不可思議菩薩摩訶薩等。而白佛言。世尊。如是勝法人所難解。世尊。一切諸法入法界性了無所得。如是法性令我等輩云何守護。佛告歡喜王菩薩。妙吉祥菩薩。并六十不可思議菩薩摩訶薩。言善男子等。如是勝法不可思議。離諸分別及以戲論。若於是法起分別想及以戲論。則法有二。若法有一。則墮生滅。何以故。此無上法第一義諦。亦無有生亦無有滅。如是了知是名守護。爾時世尊為諸菩薩。復說偈言。

無作勝法非空有 離諸言說及分別  
若有得法著二邊 是名分別諸戲論  
而於是法不相應 但能增長於染慧  
此法無相無憎愛 離諸推求無所得  
若自說言我忍空 自生分別諸戲論  
彼諸空性不可得 以分別心難思量  
若於諸法無疑謗 是即名為不退轉  
離煩惱縛得解脫 於此勝法心印忍  
若人妄了生分別 尋求推度失正解  
籌量諸法著有空 以性以相本無二  
用智求智不可得 智外更無餘智慧  
演說輪迴有為相 是智非智迷真空

若言少分是實有 若證真實即能知  
愚人妄想成流轉 增長我見有差別  
明與無明本同體 是人堅固執邊見  
說有為法名涅槃 心與非心無自性  
一切諸法本無相 法從緣起非真實  
八諦四諦明真俗 如來實智不可得  
譬如醫師治諸病 若能如是生覺悟  
涅槃本性皆平等 三乘聖智同涅槃  
法界實無一眾生 有情執自分別心  
無明妄念結輪迴 一真實諦離聞見  
有苦報故說集因 末世眾生多妄想  
以名利故破威儀 修習功德諸比丘  
遠離名聞及資生 譬如鱗角獨居山  
八十酤酖兩足尊 諸天見已咸歡喜  
智慧破暗如日光 虛妄想故成生滅  
一切諸法本常住 厭生死故求涅槃  
智者了知法無二 由不信故懷驚怖  
增長言說諸戲論 是於正法生破壞  
而彼自性亦非心 無言無說湛然空  
諸法滅盡亦非諦 亦名如來方便智  
所說諸法亦復然 隨病處方無執著  
是則名為善逝子 廓如太虛無邊際  
無滅無增無戲論 亦無一字可言說  
謂是涅槃無所住 惑業生苦常相續  
或言四種亦隨宜 由滅理故明道諦  
不為淨行而出家 積煩惱故興鬭訟  
於此勝法能成就 樂居蘭若無求取  
思惟如是三摩地 慈心加被修習者  
潛形晝夜常守護 出生勝法同甘露

其有受者智印門 夢中常與諸佛會  
汝等皆懷勇猛心 堅固修習無退捨  
爾時世尊復告妙吉祥童真菩薩言。妙吉祥。若諸菩薩及末世眾生。為欲成就無上菩提。於是三摩地智印深法相應修學。為欲成就如來八十種好。於是三摩地智印深法相應修學。為欲成就如來十八不共勝法。於是三摩地智印深法相應修學。為欲成就如來十力。四無所畏。四無量心。大慈大悲大喜大捨。於是三摩地智印深法相應修學。為欲成就諸佛五眼。於是三摩地智印深法相應修學。欲得諸佛廣大壽命。種種莊嚴勝妙國土。威德自在。於此三摩地智印深法相應修學。為欲成就諸大菩薩利根聲聞。欲得如來智慧色身。廣大總持勝妙法門。及解一切眾生言音差別心行根性。具足神通辯才無礙曉了諸法。於是三摩地相應修學。所以者何。菩薩摩訶薩。若於是三摩地而得相應。所獲如是種種功德普遍具足。成就菩提無上大法。諸法所依。名無上道。智出世間。號正遍知。自性寂靜。名為如來。如說修行而無有等。非等等故。無起無滅。出世究竟離諸言說。名第一諦。真實義諦。無所破壞。堅固調伏。是名如來不可思議最勝之法。妙吉祥。我由往昔修習安住是三摩地智印深法。見然燈佛得無生忍。授菩提記。時妙吉祥菩薩而白佛言。世尊。如來於然燈佛所。悟無生忍得菩提記。於無量劫在生死中。云何修諸難行苦行。得成菩提。佛告妙吉祥菩薩摩訶薩言。我於往昔為求

佛道成熟一切諸眾生等清淨善根以大願力經無量時勤修苦行化利有情隨其根性有上中下各令悟入三乘法義漸次修行而有所證妙吉祥我於爾時因是願行而得菩提及與涅槃爾時世尊而說偈言

若欲是法而相應 獲得如來無量慧  
十方百億諸世尊 皆悉來護修習者  
若於甘露甚深法 能解一切諸妙義  
是名總持陀羅尼 修習之者皆獲得  
解了言音滅諸罪 能破執著解諸縛  
涅槃無生亦無滅 無去無來無住處  
莊嚴十力諸相好 成就一切佛功德  
圓滿清淨解脫音 普應無量諸含識  
所出音聲能解了 一切聞者皆歡喜  
遠離邪見無分別 最勝清淨盡無垢  
能於是經相應學 究竟能得菩提道  
若人於彼三七日 一心思惟如是法  
不生懈怠捨親緣 晝夜修習得增長  
慈悲遠離於嫉妬 守護尸羅絕諍訟  
獲得平等正遍知 深心歡喜常解脫  
遠離造作諸緣起 譬如蓮華不染著  
堅固不起諸貪愛 亦如飛禽離繫縛  
得此最勝法門時 三千世界皆震動  
諸天競奏妙音樂 散施末香及沈水  
百千幢幡及天衣 清淨華鬘及瓔珞  
摩尼珠冠及寶蓋 金鈴間錯悉莊嚴  
一切諸天作歌舞 諸龍金翅修羅王  
比丘僧與優婆塞 比丘尼及烏婆夷  
各各脫身上妙衣 以用散佛為供養

恭敬讚歎意思惟 誓求於此無上道  
我說如是甚深法 發生菩提心不退  
此會河沙信解人 究竟皆得無生忍

諸餘剎土未來眾 展轉聞法心歡喜  
爾時世尊說是偈已阿僧祇數諸眾生等各  
踊躍發菩提心復有八十那由多諸大菩  
薩得聞是法於無上道得不退轉復有六萬  
三酤胝菩薩摩訶薩得無生法忍復有六十  
三酤胝菩薩摩訶薩而得三摩地無數眾生  
而得聖果十方所來諸大菩薩得悟如是智  
印三昧佛說此經已六十不可思議菩薩歡  
喜王菩薩彌勒菩薩妙吉祥菩薩摩訶薩等  
而為上首與賢劫中諸大菩薩并賢吉祥金光  
夫人諸大聲聞一切世間天人四眾乾闥婆  
王阿修羅等聞佛所說皆大歡喜信受奉行  
佛說大乘智印經卷第五

佛說弘道廣顯三昧經卷第一

一名入金剛問定意經

西晉月氏三藏竺法護譯

### 得普智心品第一

聞如是一時佛遊王舍國鷲山之頂與大比丘眾千二百五十人諸菩薩八千人俱于時世尊廣為無數百千諸眾而所圍繞敷演說法爾時有龍王名阿耨達晉言無熱宿造德本遵修菩薩堅住大乘行六度無極以具滿相勤救眾生化道無極曾事九十六億諸佛積累功德不可稱數執權方便普現五道拔諸愚冥使修菩薩無欲之行懷慈四等濟度一切傷慙

罪類故現為龍化龍億數使免殃行自處于池率諸眷屬八千萬眾又將姪女十四萬人周匝導從調作倡伎其音和雅乘龍感動協懷威德神變自由齎眾雜花奉最妙香擎持幡蓋而詣世尊至輒稽首敬問如來尋以所持香華雜寶繒綵幡蓋重調音樂欣心敬意與眾眷屬及諸姪女俱進詣佛則前長跪肅然叉手而白佛言欲問如來無著平等最正覺菩薩所應行道當云何唯蒙聽許乃能敢問爾時世尊告龍王曰恣汝所問勿疑勿難所欲如來至真等正覺當隨敷散解釋汝心時阿耨達得為神尊所聽質疑心益欣悅而白佛言天師最尊人中聖導猛如師子感變無量吾問如來普及眾生亦為菩薩大士之故為世師者拔過俗法志行清淨明盡因緣濟度群生作無請友心普安救誘育立之執持無畏十種力進伏眾魔降諸外道心無穢行被堅金剛大德之鎧志不有倦積德因緣不可計量施戒忍進定智已備心等一切蠲除雜相棄捐二見以越智度解因緣法已入深奧難極之要去離聲聞緣一覺念不捨大乘一切智心意行堅強常得自在身淨無垢暉曜明徹志若虛空無數諸劫意不倦者逮獲總持降除貪穢自大貢高等如逝者空無相願以過如住夢幻影響野馬水月於斯諸法等解不動重三寶教奉而敬之轉其法輪而無所礙欣悅信樂皆自得之如優曇花億世希出志靜安獨普有具相宿樹恭恪明賢大士尊修上義法住若此為彼正士故問如來

唯願如來至真等正覺，解說菩薩大士所行，得遊法門，入金剛德果，達深妙，使其修應獲總持場，以四諦行順化，聲聞使解要真，導眾緣覺靜起，因緣獎以一心，使等正覺，欲達諸法當入大乘，曉入大乘能伏魔場，散棄疑結，過度罪惱，普知眾生意志所行，積最辯達，布演諸法，隨一切願，化示所欲，善哉世尊，如來無著平等正覺，廣為賢明大士之故，普弘演說，使諸菩薩得致智力，降己自大，得法上力，曉解殃行，不有所造，使得施力，所有無惜，惠不望報，使得戒力，等除眾罪，而過諸願，使得忍力，於諸苦法受生之處，身命無惜，得精進力，積眾德本，志常無倦，使得定力，善寂靜解，定要行，使得慧力，而過邪見，疑冥昧，曉權方便，濟度眾生，明了勸助，具達五通，天眼無限，徹聽知，心神足，明宿，以此遊樂果，大辯才，辯才句義無盡不斷，使得總持，志無恍忽，令逮海印三昧，正定，進隨普智果，同一味，得佛志，定習樂通行，永常奉尊，而無障礙，逮法志，定勉進，定意，長久聞法，都無限礙，崇眾志，定，普令一切奉不退眾，得施志，定俗貨法，施不有遺惜，具足於戒，行念靜定，使速得佛心，而無忘昇天志，定，常念兜述一生補處，志樂菩薩清高之行，爾時龍王質疑畢，訖悅心，怡懌，重以讚頌，啟問世尊。

大仁願說現世義 菩薩德行所當入  
內性志操所應修 興發何道行云何  
順導以慈行入悲 意以度眾護濟念  
弘化定智使清淨 願垂哀傷而普說

誘眾止意及意斷 根力神足行如是  
演道七覺散示眾 願說彼德所應奉  
施調檢戒德具足 忍力普行及精進  
慧志因緣轉無量 云何度彼蒙說之  
辯才通達勉愚冥 志行詳審常清淨  
諸起生者即覺知 唯願為諸菩薩說  
欣悅之德有歡豫 聖種七財是行最  
樂遊閑居及修靜 唯蒙慈尊廣度說  
辯才行具云何得 深致總持永安住  
弘法要說常無斷 聞輒奉行終不忘  
寂滅清淨而行觀 覺意深邃智廣博  
其慧難究德無邊 解行云何應菩薩  
制持魔力與怒意 毀壞外道眾邪類  
勇德難動若大山 月明至遊弘說之  
曉空無想性所在 解了野馬及幻法  
夢想體像計皆無 唯願世尊指示說  
於是世尊告龍王曰：善哉善哉，快甚無比，乃自發心，啟疑如來，今汝所問承宿功德，已顯大悲為眾志友，不勞生死，弗斷三寶，王之質疑用是故也，聞以諦聽受而思惟，吾當廣說菩薩大士應所修行，彼此無限果最要法，時龍王言：大善世尊，願樂思聽，聞輒受行，宣布十方，勸進無倦，於是世尊答龍王曰：有一法行，菩薩應者，相好備具，得諸佛法，何謂為一，造起道意，不捨眾生，是謂一行，致諸佛法，又有三十二事，得普智心，當勤樂行，專意守習，何謂三十二，御修內性，執上最志，昇行大慈，堅固大悲，志慕無厭，發於精進，仍具猛勵，而德強力，又踰踴勢，安靜無煩，為眾忍住，習近

善友，專行法事，執御權化，施備忍行，樂於檢戒，諂想已無，滅斷偽佞，言行相應，志存反復，常有愧色，內自慚恥，已調忍，怡悅，根行至信，意而制御，得持功德，志遠小道，樂弘大乘行，觀一切三寶之事，使其不斷，是謂龍王三十二法，菩薩應此逮普智心。  
又復龍王，有十六事，進增普智顯力，弘軌，何謂十六，進普智耶，施行眾濟，具戒無缺，忍應調忍，果上精進，致定諸行，已具智慧，信行悉足，供事如來，遊靜樂閑，備六堅法，有最十善，飾身口意，德具操行，知足樂靜，身三勸彼，修勝定觀，諸德得備，是謂十六行法之事，應相祥福，演大智心，顯持佛世流化自由。  
又復龍王，其普智心，以二十二事而除邪徑，以其大乘志修普智，何謂二十二事，行過聲聞緣一覺意，已下貢高，無我自大，消去諂事，抑俗雜言，遠棄非戒，拔恚怒根，免却魔事，除去蔽礙，不章師訓，耗滅罪除，省己切惻，不論彼非，習離惡友，遠逆良善，去非六度，又逝貪惜，戒無不淨，已棄諍訟，而離懈怠，於迷自正，捨諸無知，斷去無便，却去惡行，是謂菩薩普智釋除二十二邪軌，速應權慧，永無懈退。  
又復龍王，二十二踊事，進順隨行，得普智心，而不可當，諸魔波旬及魔官屬，并與外道降而却之，何謂二十二，踊過戒事，踊過於定，亦踊過智，而過慧行，踊過權化，亦過大慈，踊過大悲，以要言之，過空相願，我人壽命，過離眾見，及發因緣，過心自淨，承覺神聖，過於識念，應不應見，過大金剛堅固之行，是謂龍王菩薩

所行二十二踊法致普智心。一切眾魔及諸魔身并邪外道不得自在。無敢當者悉降却之。又復龍王其普智心依二行處致普智心。何謂為二。如其所言修應行處。諸功德本觀道行處。是謂二事。普智行處。復有二事。其普智心而不可毀。何謂二事。在於眾生無增異心。於諸殃行濟以大悲。是謂二事。普智無毀。又復龍王其普智心有二重法而無過者。生死之黨及眾聲聞并諸緣覺無能勝踰。何謂為二。執權方便。深行智慧。是為一事。普智重法。又有二事。休普智心。何謂為二。處毀無疑滯結之心。在在不安樂俗諸樂。是謂二事。休普智心。復有二事。護普智心。何謂為二。不志聲聞緣覺行地。觀觀大乘至美之德。是謂二事。護普智心。復有二事。妨普智心。何謂為二。志常多佞。內性懷諂。是即二事。妨普智心。復有二事。不妨普智。何謂為二。專修直信。行于無諂。是謂二事。不妨普智。又有四事。蓋普智心。何謂為四。數亂正法。於諸菩薩賢明達士亦不恭敬。常無恭敬。不覺魔事。是為四事。蓋普智心。復有四事。於普智心而無其蓋。何謂為四。護持正法。謙恭受聽。尊重菩薩視若世尊。常覺魔事。是為四事。普智無蓋。又有五事致普智心。何謂為五。所行無望於生。無漏。用戒德故。不捨一切以大悲故。憎愛無二。身命施故。財利周惠。供事法故。是為五事。得致普智。復有五事進普智心。何謂為五。習善知識。不患生死。志遠無蓋。去非時心。求諸佛智。是為五事。進普智心。

復有五事在普智心。過諸聲聞緣一覺念。何謂為五。過聲聞脫。過緣覺脫。過眾智心。過諸吾我。又過習結。是為五事。過諸行法。復有五事。於普智心而有其悅。何謂為五。悅過惡道。悅審普智。悅具覺慧。悅戒無厭。悅解眾行。是為五事。普智之悅。復有五事發普智心。得五力助不溺生死。何謂為五。無其怒恨。用忍力故。能滿諸願。用德力故。降己自大。以智力故。勤習廣聞。用慧力故。過眾恐怯。無畏力故。是為五事。致諸助力。復有五事在普智心得五清淨。何謂為五。離眾穢行。淨諸墮者。因緣諸根無惑淨之。隨順諸時以觀淨之。行治於等權道淨之。一切諸法化轉淨之。是為五事。普智清淨。復有五事得普智明。何謂為五。明解無欲。明己彼心。明於五句。明達慧行。明眼無礙。是為五事。致普智明。復有五事廣普智心。何謂為五。以其五種。五根。五莖。五枝。五葉。五花。五果。何謂為五種。日修志修。而淨內性。等觀人物。求習脫行。弘於權變。是為五種。何謂五根。以大慈悲。德本無厭。勸進眾生。使免小乘。不志餘道。是為五根。何謂五莖。曉權方便。慧度無極。示導人民。護持正法。等觀喜怒。是為五莖。何謂五枝。施度無極。戒度無極。忍度無極。進度無極。定度無極。是為五枝。何謂五葉。樂進聞戒。求處空靜。常志出家。心安佛種。所遊無礙。是為五葉。何謂五花。得文相具。積滿德故。眾好繡備。種種施故。七覺財具。心無雜故。致有顯辯。不蔽法故。深達總持。聞無忘故。是為

五花。何謂五果。昇致戒果。已得度果。達緣覺果。又得菩薩不退轉果。獲佛法果。是曰五果。斯謂龍王。菩薩七五三十五事。廣普智樹道寶行也。修應之者得佛不難。

佛告龍王。其有菩薩欲受持此普智心樹。深妙明顯要行句者。當勤加習普智寶樹。如是龍王。吾視一切諸法功德。莫不由斯寶樹奧義。諸發無上正真道意。悉皆因是普智寶樹至要句也。譬如龍王。選植樹種。知此已致樹之根莖枝葉花果而甚盛茂也。如是龍王。其有能受普智心種。斯已得致諸佛賢聖最上慧法三十七品。是故龍王。欲入普智所行功德。欲轉法輪。當受持此精修誦讀專心習行。廣為一切宣傳布演。如是龍王。勤受學此。當佛說斯普智心品法語之時。諸龍眾中七萬二千皆發無上正真道意。龍王太子及諸姪女萬四千人。悉皆逮得柔順法忍。五千菩薩承宿德本。悉得法忍。時阿耨達并餘龍王及諸眷屬。自乘神力踊昇虛空。興香之雲。忽便普布。調和美香及末栴檀。微雨如來及眾會上。又化琦妙珠交露蓋。遍覆王舍一國境界。而悉歡悅於上歌詠。至真如來積祚巍巍聖德無量。列住雲日各現半身光文虛空。一切眾會莫不見者也。

#### 清淨道品第二

於是龍王復白佛言。甚未曾有。唯然世尊。乃若如來博為眾生。說道俗心及普智心行德所應。又唯世尊。如來無著。平等正覺。願演散說菩薩之行。修應清純明賢所由。得道清淨。

使其終已長久無垢不中有懈無倦弗退至得十力四無所畏而得具足諸佛之法爾時世尊告阿耨達善哉龍王勤思念行吾當廣說菩薩大士清淨道品阿耨達曰甚善世尊幸蒙授教唯願說之於時聖尊告龍王曰菩薩行有八直正道當勤受持何謂為八六度無極道恩行之道得五通道行四等道及八正道等眾生道三脫門道入法忍道如此龍王是為菩薩八正行道何謂菩薩度無極道度無極道者諸所布施勸彼普智何則然者不以無勸施成普智其行勸助於德本者斯得施度無極名目又及行戒忍進定智亦以勸助彼普智心乃得慧度無極名目是曰菩薩度無極道恩行道者含受眾生何則然者以彼菩薩演示法度菩薩行恩含受一切覆以四恩廣為說法而使眾生順受戒化是四恩道神足道者觀諸佛士天眼徹視見眾一切生者終者又見十方諸佛世尊弟子圍遶悉見如是於諸佛士以其天眼應當所採而採受之又其天耳聽諸佛言聞輒受行在於眾生及諸類人而皆明曉悉了知盡為隨說法得識宿命不忘前世所作功德又具神足遊過無數諸佛國土應以神足當得度者輒弘神足而度脫之是神足應道又何謂為四等行道其隨修淨梵志中者并及諸餘色像天子知彼意行隨順化者斯則慈悲是為喜護建立以道使彼應度此謂菩薩四等行道其八正道普悉行之聲聞所由緣覺依因大乘亦然謂賢聖八直正道何謂心等諸眾

生道當為此興不為是興為斯可說為此不應是有賢德此非福人斯為盡應此復不應行等菩薩盡除此意是謂心等諸眾生道何謂菩薩三脫門道得致以空斷諸妄見以其無相除眾念想應與不應以其無願永離三界是謂菩薩三脫門道何謂得致法忍之道受拜菩薩菩薩自覺行應於忍得為諸佛世尊所決授者無上正真道意是謂菩薩不起忍道菩薩致此八直正道弘化流布權導無礙時佛說是八正道已二萬四千天龍及人悉逮應此八道行也

若是龍王菩薩以此八直正道等塗一歸用無等故莫有能與菩薩比者亦無其侶獨步三界靜一心時修致慧行應當所得已自果之明達諸法而知本無斯謂如來是曰龍王八正之道為彼一切凡諸若干眾生所行興種種說而此要說等同一向以無妄說歸未生說也云何於此道清淨耶曰道無垢用無塵故是道無瑕本無念故是道無冥慧照明故是道無著本清淨故道常無生無所滅故道如永無本無有故道無漏穢三界淨故是道寂然過凡行故道無可至無有去故道無所來無從來故道恒無住過諸欲故道無所處過眾見故道無勝者過諸魔故道大弘覆外道不及故道永離妄自大者故道無所容不修入故是道極遠用希望故道為乖難愚夫行故道可果致修行者故是道夷易樂勤行故道極平坦住正見故是道無妨修無毀故是道無礙等正行故是道無垢三毒淨故

是道清淨終無著故是謂菩薩道之清淨若是菩薩於清淨道務進勤修又應行者彼於法性已悉清淨得淨我性亦以而過法性淨故則數性淨數性淨故無數性淨無數淨故得三界淨三界淨故眼識性淨眼識淨故意識性淨意識淨故得空性淨空性淨故諸法性淨用是淨故則諸法等淨如空空等淨故得眾生淨以諸淨故便無其二亦不著二無二淨故則道清淨以斯言之清淨道也彼無眾念亦不念道諸念悉淨若如泥洹於彼永無是謂無念應無所念無念道者亦無識念其道都無心意識行以此言之清淨道也說是清淨道品法時二萬天人皆得法忍

時阿耨達復白佛言云何世尊菩薩大士修是清淨而應向道聖尊告曰如是龍王菩薩大士欲行斯清淨道意者當曉淨行亦使其身口意清淨何謂身淨己身已空解諸身空身之寂靜解諸身寂身之已脫解諸身脫身之怠慢解諸身怠身之如影解諸身影是謂菩薩清淨道也又云身淨身行無生其有生死觀於無生彼以無生而等生死則知其身亦曉身行何謂身行去未生法來無盡法見在量法終無盡法其無盡者是謂身行

又復身法因緣合會其因緣者則空無想淡然無念若此龍王是像法觀斯謂身淨又若如來身之無漏不墮三界觀身無漏如如本無以無漏身不墮三界彼無漏身能入生死其無漏際無倦捨退以無漏身示現色身如此現已亦不念滅身之法本如如來身淨眾

生身淨。己身亦淨。等如本無。是謂菩薩行應清淨。何謂口言為應清淨。一切賢愚言皆清淨。所以者何。用等相故。凡夫劣勢著於音聲。若信不諦。憂喜無常。樂於顛倒。觀察眾生無本。都無姪怒癡欲。何則。然者以諸字說聲出。皆淨。無欲恚愚亦無其著。以此謂之一切言淨。以言言之。何者為言。以欲恚癡而為言耶。諸垢為言乎。言者無著。不著眼耳鼻口身心。所言風像風動聲出。因緣合會。使有聲耳。所言如響。賢愚所言皆同如響。所可言者不住於內。亦不出外。於其中間而不可得。住本所念及其所行。出於言者。并所念想。無住無想。是謂龍王。如來所言及其眾生一切音聲。皆空非真。捐斯法耳。曰。唯世尊。如來所言斯不諦耶。曰。是龍王。如來審諦。所以者何。如來諦故。解知諸法非真非諦。又復龍王。如來所言隨字音聲。皆答眾生一切音聲。爾故眾生亦轉法輪。而亦不知法之義順。以此報應使其行之。隨如等滅眾苦之事。曉解諸法行了如是。眾生音聲已無所住。在諸煩惱而常閑靜。現出欲言於著無著。聲出所言。講論談語。其如法者。不有違錯。是謂菩薩口言清淨。

何謂菩薩心為清淨。其心本者不可染污。所以者何。心本淨故。其所謂客欲垢蔽。菩薩於斯不有所著。了解以權於本自淨。又其心行不撰德本。彼德本者了識心本。以此心行慈及眾生。識了知彼空無我人。其心德本助觀於道。知等彼道。觀如是者。斯謂心淨。以此淨心與諸姪恚愚行者俱。而永不受欲怒癡

垢與操行俱不著諸穢。是謂菩薩身三清淨。說斯清淨道品法時。二萬菩薩逮補生處。

### 道無習品第三

又復龍王。其菩薩者。乘是淨心。生於欲界而在形界。與諸天俱處眾梵中。詳安靜然。在中進止無勝動者。又斯菩薩能降諸天。化導以權。或生形界而在欲界。現如有家與諸眾生周旋坐起。不與有勞。弗慢眾生。亦無自輕。彼以斯淨諸定正受。盡自為定。不隨正定而有所生。何則。然者以彼菩薩執權方便。心應淨故。若此龍王。菩薩曉解清淨行者。當修清淨已而習道。如是龍王。菩薩不習以求道。習不習無習。以想道。習亦不習於望道之習。亦不求習。了解道。習不習所生。冀向道。習不習行滅而為道。習亦不求習。以為道。習不習無習。為道之習。不習執捨以習。道。習不我人壽。不身無常。不身性苦。不身有我。不身夢幻野馬影響。亦不身空無相無願。不身無欲。法行習道。以要言旨。身性諸情。亦不興有十二因緣。乃至老死無欲之法。不數無數道無二習。不俗無俗。不漏無漏。不犯無犯。不二之習。以求道。習。又復諸法無習之習。是道無習。斯謂道習不習之習。如空無習。亦不無習。當如此習。是道無習。無相無願。彼不作習。亦非無習。當作是習。無耦不耦。諸法無住。勤習如此。乃應道。習。當佛世尊說是清淨行無所習。道品法時。三萬二千人及世人。悉皆逮得無所從生。法樂之忍。五萬天人宿不發心於菩薩者。皆發無上正真道意。七萬菩薩逮得法忍。爾時

一切同聲而言。世尊。其有族姓之子及族姓女。逮聞說是清淨道品無習法者。其值聞已心無驚恐。不捨退者。是皆受習。如來無上正真道意。得轉諸佛所轉法輪。又唯世尊。是輩菩薩悉獲無上正真道意。為無量人分布斯法。亦復當坐師子之座。當於天上天下人中。極師子吼。猶若如今如來之吼。悉降魔眾。伏摧外道。顯樹法幡。熾法輝明。震雷法鼓。已鳴能降法雨。爾時世尊見諸天龍神之眾。人與非人。又及四輩。聞其至說莫不悅懌。於是如來為阿耨達重復弘演。而說頌云。

道非習可得。無乃興習想。其道行加此。棄離習念行。不望求習道。蕩除眾異想。其道都無習。清淨像明月。若有起習想。無處亦不習。已過無習處。得致最上道。道為無我念。亦不與空習。是道無有二。安快而無上。命壽亦如此。無人及與言。其道不有人。無命亦無住。諸有習道者。而欲住於空。斯去聖路遠。是不應道。習。道亦無有空。以捨於有習。如本同一相。永空空於空。道為無起相。亦不有滅相。不起亦無滅。彼悉為道。習。吾音譬如幻。解想當如此。持想行所習。道當何從生。道為都過俗。彼不有身習。亦無滅身行。可得致於習。是身根之家。本無所演廣。彼不有餘求。本無不可得。其習是道者。當如如本無。如本知本無。是謂應道。習。諸法之本無。所覺若如幻。解行而致此。乃應道之習。若其不至道。所作如不住。

無能止其行 佛法不由道 若如所習道 并及與無習 所演為如此 以住於本無 有限餘道者 劣乘之所依 是者無上道 大乘所因由 諸興此道者 以致而無住 斯則顯行德 可致應道習 道正而無嶮 端直且平坦 勤親行此道 永離眾邪迹 若如卿龍王 自住其宮室 不動於所處 降雨充大海 大士亦如是 習道如所行 法身而不動 能滿於智海 又如仁龍王 在於大地上 以雨遍充足 其不有身著 菩薩德如斯 行此之所習 用法滿眾生 其內無所著 若如阿耨達 龍王大神變 勝道德如是 感動普十方 眾生墮邪徑 諸墮受著見 其住是道者 將順度無為 已住於斯道 菩薩果大稱 能降魔波旬 并及邪外行 得道如其如 如道無能動 踊過諸俗法 其行譬蓮花 道心無有愚 是行為住止 千數諸眾生 化度立以道 以常住斯道 得致於五旬 神足諸感動 為眾廣說法 諸事悉清淨 身口及與意 當願賢聖道 人性不可議 忍行為無著 其往所可至 斯得如來處 示導諸眾生 生死於至歸 斯處則如來 其往似若至 此為無所至 眾生所可至 當念彼上處 學最佛之道 遊樂以幻法 其作是習道 弘道之所習 彼眾德儀行 諸佛所稱歎 其德無有邊 終不可極盡 如此習道者 不習亦無住 彼處不咎魔 眾都不著行 其順此道者 不起亦無滅 已得意志行

總持弘大辯 施惠及戒忍 遂增進若海 身口穢以無 心潔乃清淨 垢消永無瑕 修應此道者 得昇於知達 所行習深妙 難動慧無即 守習是道者 其諸最正覺 過去與當來 現在亦如是 致道世所歸 彼已離眾難 值世遭難遇 永為諸佛子 其聞此法者 快哉諸眾生 至善聞斯法 真應奉如來 其樂是經者 有曉此道者 能斷諸情態 紹德具眾相 得應三界將

佛說弘道廣顯三昧經卷第一

佛說弘道廣顯三昧經卷第二

西晉月氏三藏竺法護譯

請如來品第四

時阿耨達自與其眾諸眷屬俱稽首世尊跪膝叉手而白佛言願請天尊迴屈神光往詣無熱之大池中盡其三月吾等志樂供養聖尊并諸神通果辦菩薩及上弟子蒙愍納許願受其請所以然者吾等供事至真正覺豈能應於如來儀耶冀蒙逮聞寂靜上化唯以此法應供養也思願重聞如是像法令常歡悅此乃應奉於三寶耳爾時世尊不受其請重啟二月如來不然垂聽一月世尊不可願納半月世尊默然而已受之於是龍王自與其眾諸將從俱見尊受請忻喜悅懌善心遂生遶佛三匝興震雲電而降微雨普遍天下忽然之頃還昇宮中時阿耨達到坐正殿輒召諸五百長子其名善牙善施善意善明能滅

寂相感動大威甘威甘權甘德普稱威勇持密忍力行祥如是比等五百長子宿樹無上正真道已王告之曰又諸子等吾今以請如來無著平等正覺及眾菩薩諸弟子俱盡其半月世尊正覺垂大慈哀興有弘愍而尋受請汝等當共同一其心廣相勉勵加敬世尊至真如來勤念無常當各寂靜謙恪恭肅住待如來宜應棄捐淫心欲意及龍戲樂除貪怒害離欲色聲香味細滑所以者何世尊無欲而且詳安仁雅審諦順調寂靜顯備諸德侍從圍衛儀容無量皆承諸佛真正要戒以是之故汝等半月無得入宮當除姪患愚癡之念又復如來宣講法故必有他方神通菩薩釋梵持世宿淨天子當普來會汝等勤念廣施殊妙光顯嚴飾慎勿中懈令諸會眾觀變踊躍此乃真應供養如來時阿耨達都約勅訖輒為如來於雪山下無熱池中為世尊故化其無瑕淨琉璃座而使縱廣七百由旬乃殊異妙周匝列置八萬四千雜寶琦樹技以眾珍諸寶鮮飾蔚有光華精耀百色中出美香諸樹間化八萬四千七寶之堂眾珍光彩極好無雙施置十萬交露綺帳乃垂異妙赤真珠貫在諸堂上有師子座八萬四千皆大高廣而布無價妙好雜氎床座寶分施諸交露技以眾寶所在堂上有龍嫫女各二千人其色殊妙姿美無量顏像麗華口出熏香擎持雜花末香塗香調作諸妓以詠佛德興悅眾會於上虛空化大寶蓋周千由旬遍覆會上琦珍綵鏤其寶蓋中眾色無數懸好繒幡於

幡綵間垂諸寶鈴。景風和降音踰諸樂。施饌百味備辦都訖。為此變已。與其眷屬恭撿叉手。向佛跪膝而遙啟尊。以其請意歎詠頌曰。

慧藏智富積辯德。慧達無著明導眾。慧弘普至不有礙。慧解心行唯大仁。最上神尊受吾請。知足無貪而易養。善行質信知眾意。其德普稱行等王。至仁清淨踰若空。威御十方猛持世。度眾最首悲踊行。色妙端正相綵身。志樂歡悅惠法施。梵聲清淨若雷震。妙音具足悅諸士。佛土三千無等倫。聖尊明觀眾生行。知時普應懷權化。詳審之行目明好。眾生甚多普渴仰。大仁德峻勇而果。慚祥備足德最上。師友無雙協懷眾。於世威猛普慈救。開布散示唯天尊。爾時世尊知阿耨達請時已到。告諸比丘。著衣持器。差應留守。無熱龍王遙跪啟時。應受

半月宜便即就。於時八萬四千菩薩皆大神通德具果辦。弟子二千亦上神足。侍遶世尊周匝而導。至真如來從鷲山頂忽昇虛空。神力而進。如其色像身放無數百千之光。遍照三千大千境界。普悉晃明。諸欲色天皆見世尊。揚光無數飛過虛空。自相謂言。神尊致彼無熱王所。將興法化演奧無極。及使如來為眾圍遶。即彼半月。中多諸天數百千眾。得見世尊。又聞說法。緣復觀觀無熱所設莊嚴感變。而令世尊故遊到彼。時諸天子各各發念。供養如來。或願散花。或雨名香。或施天樂。以歌佛德。或復懸幢幡蓋。繒綵率隨如來。世尊身光。照耀煒煒。明踰日月。宿淨色淨。及諸天光。佛之聖威。神耀無量。根定寂靜。行遊詳安。釋梵四天。威變種種。奉敬追侍。隨從如來。於時聖尊到雪山下。住止右面。便告賢者大目連言。汝到無熱王所處宮。當宣告之。如來已至。時可應入。於是賢者大目連。承佛神旨。忽遷無熱大池之中。現於虛空。去地七丈。化身像者。若金翅鳥王。住阿耨達龍王宮上。便告王言。如來至也。彼諸龍眾及姪女等。無不愕然。驚恐怖悸。衣毛為豎。四之藏竄展轉相謂。此池自初無金翅鳥。斯從何來。時阿耨達告諸宮人。太子眷屬。而慰之曰。且各安心。勿恐勿怖。此為賢者大目連耳。承如來使。興神足變。賢者目連到彼告訖。還詣世尊。時阿耨達便與其眾。諸子臣民夫人姪女。舉宮大小俱而圍遶。各奉名花及美末香。并眾塗香。幢蓋繒幡。倡伎種種調作。相應進迎。正覺。于時世尊為諸菩

薩及眾弟子。天龍尊神所共圍遶。俱而前至。無熱所設廣博座場。如來到已。尋就高顯師子之座。菩薩相次。然後弟子諸眾坐訖。爾時龍王觀視世尊及諸菩薩弟子眾會坐悉而定。興心無量。內懷怡悅。輒與其眾手執斟酌。所設饌具。踰世甘肥。延有天味。餚餽百種。以用供佛菩薩弟子。并諸眾會。使皆充足。世尊菩薩及諸弟子飯畢。輒各洗蕩應器。察眾都訖。時阿耨達即啟如來。願聞說法。於是世尊日昃時後。便從定起。端坐說法。諸來會眾滿千由旬。從地至上。中無空缺。天龍鬼神及人非人。周匝衛遶。至真正覺。一切會者各懷踊躍。

#### 無欲行品第五

爾時龍王悅顏進前。跪重白佛。唯願世尊為斯眾會。如應說法。令諸一切免離生死。永除相著五陰諸苦。穢垢昧昧勞塵之行。使其永無三毒意結蒙。及龍眾得棄邪冥。伏其心意。弘致至善。使有悅豫。深行菩薩後。若如來現有存亡。當使吾等所在國邑。護持正法。於是世尊讚龍王曰。善哉善哉。阿耨達王。諦聽其義。勤思念之。以宣布示吾當廣說。令此會眾多免罪痛。根拔雜想。意識志疑。使解普智昇遊三界。時龍王言。善哉世尊。願樂廣說。當頂受行。是時聖尊告龍王曰。有一法行菩薩應者。為天世人甚所敬重。何謂為一。志修深法。以行無欲。何曰深法。法行無欲乎。如是龍王。菩薩依順因緣之無離二見際。知有無者。斯見諸法。依著因緣。不見有法。不由緣生。彼作此念。其依因緣。斯無依緣。彼不依魔。其依緣者。彼不

言吾亦不言我。又其依緣中無我。我所依緣無主。亦無執守。其依順緣了解起生。速易得致四依之念。何謂為四。依於至義而不文飾。依於慧行不為識念。依順義經不依攀緣。依念於法而不為人。彼何謂義。何等為慧。云何順義。何謂念法。義謂空義。不受妄見無相之義。不著念識無願之義。不著三界無數之義。不著於數。又復義者。於法非法而無其二。音聲無得。念想無念。法處無住。用無人故。命壽言聲。偽無所有。又復為義。其法義者。為無欲義。何謂菩薩為法義。其無眼色耳聲鼻香舌味身更心法之義。不生色義不滅色義。不為痛想行識之義。亦不生滅識行之義。亦不欲色無色之義。亦不生滅欲色無色之義。亦不我義。亦無我見著入之義。不有入義。亦不著入見入之義。亦不著入有佛身義。亦不法字著入之義。不數計會有著入義。亦復不有施戒忍進定智著義。曉入一切諸法之義。是謂菩薩為法義也。其從是義而不有退。是謂為義。彼何謂慧。日光無生慧。習無念慧。盡都盡慧。道無志慧。於陰幻法諸性法性而無毀慧。在於諸情空取為慧。解入諸法明了眾生。根滿具慧。志念無忘。於諸止意不意無念。於諸斷意等善不善。於其神足身心建慧。又於諸根了輕重慧。於諸覺意覺諸法慧。而於諸力已降調慧。道為無數於滅寂慧。觀別法慧。始不生慧。來不至慧。中無住慧。於身像慧。言以響慧。心法幻慧。是謂菩薩明達智慧。又何謂為順導義經。從是因緣而起。然者滅於愚癡。滅

於老死無我。而然於無我人及與命壽深解諸物。若如來我皆非真法。而然於三脫之門也。等於三世求三無著。所謂諸法見都無生。視了知者而得等滅離俗情態。菩薩來智慧度無極。於諸意念而無疑惑。應入是行斯謂順義。無所去至亦無從來。泥洹無為不有去至是謂順義。何謂如法。若諸如來興與不興法身常住。是謂如來。如如本無而無增減。不二無二真際法性。謂之如法。不毀行報無行報法。斯謂如法。大乘者由六度無極。緣一覺乘從因緣脫。聲聞之乘依音聲脫。是謂如法。施致大福戒得生天。博聞多智定念致脫。斯謂如法。從行不修興有生死。行之純至而立無為。如法之謂。愚以欲力智則慧力。斯謂如法。其一切法悉依法性。如此龍王。其依因緣而起生者。斯則應得四依之念。其依因緣彼則不依斷著有無。是謂其見因緣起者。斯見諸法。其見法者。斯見如來。所以者何。因緣乎。龍王等起無起於法非法等而無著。又如來者亦為無著。因緣之起。亦無有起法不可得。覺其法者。斯則如來。於因緣起慧眼見之。慧眼見者。斯則諸法。見諸法者。斯則如來。是謂其見因緣起者。斯則見法。其見法者。斯見如來。又如來者。以法見法。如是龍王。若以此法行應脫者。斯謂菩薩而無欲行。又呼龍王。無欲菩薩不作欲習。悅樂賢聖捨非賢聖。勤慕興護於賢聖種。廣合諸慧為法作護。修於博聞志樹無忘。不捨戒身智身無傾。定身不動。於其慧身得善堅住。脫慧見身強固難轉。脫

慧見故。又復龍王。無欲菩薩得無數佛正法度義。亦具無數諸佛要慧。又果無盡諸佛之辯。得通無量諸佛神足。因致無數諸佛權解。普入無量眾生之行。遊過無數諸佛國土。因見無數百千如來。緣得聽聞無數諸法。得無數義達無數慧。曉無數行度無數眾。若是龍王。無欲菩薩常應清淨。消盡眾穢德不可量。三界自由不有所著。何則。然者。以其無欲自從心生。有三事從心出生。何謂為三。從其欲生。又從愛生。亦由起生。復有三生。觀於起生。又觀起生。又觀所行觀心無處。又復三生。滅寂專一。曉解於觀。如法隨行。又復三生。德備仁調。以為寂靜。從行勤生。又復三事。從於行直。而無有諂。仁慈調忍。復有三事。無沈吟疑順。善不麁。志足易養。又復三事。從其空生。又復無想。亦由無願。又復三事。心之所生。諸法無常。從其心生。諸法皆苦。亦由心生。諸法無我。亦從心生。復有三事。而從心生。諸法無常。諸法無我。滅盡無為。皆從心生。如其龍王。菩薩等滅亦由心生。謂其不捨普智心。行等一切。以大慈故不捨眾生。大悲心故不厭生死。用大喜故等離喜怒。以大護故所有慧施不望報故。眾戒學行德義備故。內免己過。不論彼短。能忍眾生諸不善行。欲令彼人心固金剛。合集眾善諸德之本。身命無惜。得致一切。諸定正受心無勞倦。不以正受而有所生。曉智以權順隨眾生。以其諦慧度諸志脫。欲達聲聞緣覺乘者。顯念佛法求諸佛法。心能忍苦廣宣法故。眾利敬養蔑而棄之。志

①我所(龍)(明)-我(正)(龍) ②色之(龍)(宮)-色(正)(龍) ③入(龍)(明)(宮)-人(正)(龍) ④入(龍)(明)(宮)-人(正)(龍) ⑤光(龍)(宮)-苦(正)(龍) ⑥志-去(龍)(宮) ⑦於法(龍)(宮)-法於(正)(龍)

具諸相德行無厭，充滿智慧，博勤多聞，習善友，故值善知識，用謙敬，故得應謙行，降自大，故以降自大，志行備故，具滿意行，用無諂，故以離諂者，言行應故，以其無欺，修誠信，故以住信言，離眾欺，故滅除妄語，生誠信，故降心於信，如是龍王，其有菩薩，而生是心，斯謂無欲，又復龍王，無欲菩薩，魔不能得其限，便也，所以者何，以彼菩薩，應無限故，而亦不行有限之法，彼何謂為是限法乎？欲姪恚癡，斯皆有限，菩薩於是，不有所著，以此謂之為無限也，聲聞緣覺，其乘有限，菩薩住於普智心者，魔終不能得其限，便有念無念，心想有限，菩薩以離眾念之應，如此菩薩，魔不能得其限，便也，如是龍王，有二魔事，而是菩薩，當深覺之，亦當遠離，何謂二事？於其師友，無恪敬心，而自處大貢高，蔑人，是謂為二，又二魔事，捨菩薩六度，無極藏心，返喜樂，親行聲聞及緣覺法，復有二事，何等為二？無其智慧，而欲行權，與諸墮著，望見眾生，樂相狎習，復有二事，寡聞少智，自以慧達，雖有通博，於中自大，又復二事，於德甚少，望生尊貴，若修德行，而樂小乘，復有二事，正法不護，不度眾生，復有二事，志不樂習，於諸菩薩，及眾通達，明智者，俱專行誹謗，清高菩薩，主為法師，數興蔽礙，又障師訓，而多諛諂，又二魔事，捨諸德本，心存不德，復有二事，雖在閑居，懷想三毒，志常憤悶，若遊國邑，有貪利心，復有二事，為非其人，說深要法，應當為說，而反不說，復有二事，不覺魔事，遠離普智，意數錯亂，如是龍王，其諸

魔事，色像若斯，無欲菩薩，而永無此，又復龍王，若有菩薩，修於清淨行，應無欲，當致菩薩十六大力，以此諸力，降調己志，以化眾生，何謂菩薩十六力耶？曰：得志力、意力、行力、慚力、強力、持力、慧力、德力、辯力、色力、身力、財力、心力、神力、弘法之力、伏諸魔力，無欲菩薩，得是菩薩十六大力，何謂菩薩為志力耶？如是龍王，菩薩志力，能覽諸佛一切所說，總而持之，是謂志力，斯菩薩，意應諸佛行，於諸眾生，而無斷礙，是謂意力，能達一切音聲，所說，解了諸義，是謂行力，離諸罪行，興眾德法，是則慚力，一切諸難，不為非行，斯則強力，億千魔兵，不敢而當，是則智力，通達持法，宣示等學，而無遺忘，斯則持力，無著不忘，於百千劫，其所可說，無礙不斷，隨解諸法，是則辯力，若諸釋梵，及四天王，往詣菩薩，黯然無色，是端正力，以其寶首，所可念願，應意即至，是則財力，過諸外道，在中獨尊，是則身力，眾生之心，能一其心，知眾生心，順行化之，是則心力，眾生應以神足度者，為現神變，使眾覩見，是神足力，若所說法，使眾聞之，而無中斷，彼受順行，等除苦盡，是弘法力，若其禪定，正受之時，得承佛旨，賢聖行法，是降魔力，斯謂菩薩十六大力，其有行者，志慕願此十六之力，而欲得者，當修無欲，譬如龍王，一切河流，歸於大海，道法諸行，三十七品，悉歸無欲，又若龍王，諸藥草木，依因於地，諸善行法，皆由無欲，譬如龍王，轉輪聖王，眾生所樂，若此，其有無欲菩薩，乃為諸天龍鬼世間人之所愛樂也，爾時世尊為

阿耨達并諸太子而說，頌曰：欲為慧菩薩，志願佛道者，彼當離穢法，常勤行，無欲慧解，因緣法，不狎於見際，覩法以因緣，無緣不有法，緣生彼無生，是不與自然，著緣斯亦空，知空彼無欲，著緣而無相，脫願寂復寂，澹泊像大愚，其處魔不審，見法無著緣，於其無吾我，彼不有我人，知是則無欲，無主不守護，不獲亦弗捨，本脫無取捨，離欲常了法，觀義不為飾，慧行常脫識，曉了順義經，依法不為人，空義是佛法，及脫無相願，不狎造見念，是義其無欲，於法不有二音聲，無可得處法，難可動，不入義，無欲法，義無欲義，眼耳不色聽，鼻口離香味，身心無更法，不色生滅義，又不離痛想，亦無識住我，達是應法義，不住三界義，亦無吾我義，世尊無色身，無字法說義，計數非法義，至要不以施，非戒忍進定，慧無我世尊，諸法解無義，智謂是法要，於義永非義，無欲則佛法，無生曉若慧，不起無有滅，不生亦無終，如是應尊習，五陰解若幻，知其如法性，曉內如空聚，了是為無欲，知法至趣向，明達眾生情，斷念以止意，無欲得是慧，意斷無有二神，足心輕騰，以力而無慢，諸根知止足，覺定解以智，明了八直道，慧觀於滅行，解法所至歸，本法不有生，當來而未至，現在無住法，不欲知如是，身像無堅固，語空譬如響，心幻若如風，無欲解如是，知說順義經

了達於因緣 本癡生死滅 無欲是慧義  
 無我人命壽 解了法非法 以脫於三門  
 所說空無著 無生見滅道 習慧喻俗行  
 不從心意生 無欲覺是行 法性常如住  
 佛興及滅度 無二覺不覺 無欲知是法  
 其積如本際 彼積悉諸法 空積及人際  
 無欲達是智 法性常以住 覺起而滅度  
 不識知其二 無欲法如是 不殃善不善  
 知法無罪報 佛法不從他 從行度無極  
 以離因緣聲 音脫聲聞行 惠施致大富  
 彼見戒生天 博聞得智慧 守意化眾生  
 至聖都守意 無欲法如是 力常轉諸欲  
 智慧志存法 等念是諸法 法性常無得  
 識知因緣起 而致四德行 知義及與法  
 順義知無欲 觀緣彼見法 以法見世尊  
 等於起滅法 無欲了尊法 因緣跡無得  
 音聲法無字 斯法得本無 是聖謂如來  
 以慧見因緣 無見不見法 明慧了因緣  
 是謂見世尊 彼永無欲行 悅情諸賢聖  
 法性毀不捨 而護聖賢種 常護佛正法  
 無欲聞不忘 戒根不捨離 於定達難動  
 知身慧不動 常住於脫身 及脫慧所見  
 無欲常安住 解人諸佛法 無量眾聖道  
 得佛神足具 辯達一切行 知眾情意行  
 忽然遊諸土 得見諸如來 受彼所說法  
 聞守解達義 宣示無量人 知彼億數行  
 志得向無數 無欲當自在 降心入功德  
 伏意使無欲 終不遷是世 諸陰心以脫  
 了知起滅處 觀滅無所有 所習以而無

聲性心所行 不諂常端直 無佞調仁善  
 無欲德如斯 以脫空相願 解苦知生死  
 無我法常寂 無欲從心行 普智心等慈  
 以悲濟眾生 喜不厭生死 行護無有邊  
 所施無望報 省己立諸行 忍耐善不善  
 念脫彼眾生 勤精強修德 不計有身命  
 以次知諸定 亦不隨於定 慧定大精進  
 於數不墮數 以諦化聲聞 智不志滅度  
 無欲值佛世 彼有此諸法 魔不知其行  
 安住法了是 無欲不有限 曉是貪垢限  
 離欲彼無想 魔不知其處 其想吾我應  
 彼自起魔事 是悉度諸行 眾魔而不審  
 無欲志不忘 所行常清淨 無欲不意志  
 慚行而不毀 以聞無欲者 悅慧敬如來  
 其住如法住 彼應如世尊 諸佛十力者  
 菩薩欲奉事 聞斯無欲行 勤意當受持  
 其聞此無欲 悅信廣奉行 彼常致無欲  
 得佛是不久 無欲聖所由 而致最清淨  
 無欲得成佛 以化無有邊 去來現在佛  
 諸得眾相好 悉從斯無欲 及行是法故  
 爾時世尊說是無欲法品之時諸在會者四  
 萬二千天龍鬼神人與非人皆發無上正真  
 道意萬二千人得不起忍又八千人逮柔順  
 忍三萬二千天人神龍得離塵垢悉生法眼  
 又八千人而離欲行八千比丘漏盡無餘當  
 爾之時三千大千世界六反震動普遍十方  
 熾然大明於雪山下無熱池中周匝現有所  
 未見聞光耀妙花皆至于膝其池水中普生  
 乃異鮮飾蓮花大如車輪中出美香花色無

數百千諸種皆是佛之威神所致亦為是法  
 興其供養以悅無熱龍王意故  
 佛說弘道廣顯三昧經卷第二

### 佛說弘道廣顯三昧經卷第三

西晉月氏三藏竺法護譯

#### 信值法品第六

爾時阿耨達龍王心甚悅豫又及龍王五百  
 太子宿發無上正真道意聞佛說是尋即皆  
 得柔順法忍忻心無量各樂供養輒為如來  
 施飾寶蓋進上世尊同時白佛言聖師如來  
 至真正覺為吾等故出現生世何則然者令吾  
 等聞普信道品得聞是已意而無倦不有懈  
 退亦無驚恐聞以加重專心習行樂聽無厭  
 如是像法也又惟如來解說菩薩云何得值  
 諸佛世尊如來告曰諸賢者等勤念受聽吾  
 當廣說諸太子言唯思樂聞彼諸上士受世  
 尊教如來告曰樹信賢者興值有佛何謂為  
 信信謂正士修諸明法奉之為先何謂明法曰  
 依行應不離德本習求樂賢慕隨聖眾勤心  
 樹信志無勞疲思僥聞法拔棄陰蓋順習於  
 道得法利養以施周惠戒與不戒濟接等與  
 在諸悲怒而常有悅勤樂普智心無懈退信  
 佛不休未曾亂法悅心聖眾志道難動喜樂  
 正真而離貢高於眾自卑常有等心諸處無  
 著終捨身命不造惡行修立質信言行相應  
 等過於著心無垢穢身口意行順隨聖化明  
 了諸事得為清淨知足無貪所行應淨曉入

智幻習求慧根。依順七財修念誠信。根力以備而行正見。所受師友謙恪禮敬。安足易養。數詣法會。心無退厭。有患生死。示無為德。勤心精進。求昇普智。以弘道化。於如來法。志樂出家。修諸無數梵清淨行。造立慈悲。救彼眾生。志存反復。其有報恩及不報者。等接護之心。無適莫。不自念利。常悅彼供。忍調之行。以悉備足。目見無惡。不背說人。內性以寂志於閑居。心常樂靜。專念習法。而無諍訟等。已彼過。求備戒具。集合定行。勤謹於道。斯謂賢者。行應俗信。樹信如是。此謂興信。值佛世者也。又賢者等。其於世俗造信無忘。是謂興信。值佛世也。又賢者等。何謂俗信。其有信者。信諸法空。以離妄見。信知諸法。以為無想。而離念應。信知諸法。悉皆無願。不有去來。信知諸法。無識無念。靜身口意。寂無有識。信知諸法。以為離欲。無我人壽命。信知諸法。信知本無去來。自然。信知諸法。真際無跡。如本無跡。信知諸法。已皆自然。等若空跡。信知諸法。而依法性。信知諸法。等過三世。信知諸法。欲處邪見。而皆悉盡。信法無著。以離本癡。本無清淨。信知諸法。心常清淨。亦不興起。客欲之垢。信知諸法。無所觀見。信諸法。護等斷眾行。信法。無我以過喜怒。信諸法。無心無形像。而不可獲。信諸法。偽如握空拳。誘調小兒。信法。無欺。不有上下。無所捨置。信諸法。虛若芭蕉樹。信法。自由如常寂靜。信法。無審不住三處。信法。永無不有所生。信法。若空。以等無數。信知諸法。若如泥洹。常自寂靜。如是賢者。其於世俗興起。是信。

斯謂造信。而值佛法。又復賢者。其有信。值佛法名者。此則名曰諸法。都無起之謂也。所以者何。不色生故。不色無生化轉之習。不痛想行識。已無識起。不以眼耳鼻舌身意。無起轉習。不身起轉。不癡有無。不生老死。有無起故。如值佛世。不起有生。亦不起滅。又復無起。習於無滅。不以正意。無志意。習而值佛世。總要言之。亦不以三十七道品法。起無起。習。亦不以道無生之習。不引起慧。亦不滅慧。不慧無慧。無二之習。如值佛世。當說信。值佛世品時。無熱龍王五百太子。皆悉逮得柔順法忍。於是世尊復說頌曰。興信。值佛世。而習於不生。其無向信者。斯不值佛世。修信。謂最上從致清淨法。行質有報應。不違厥所修。信。習諸賢聖。勤修常禮敬。心不有懈怠。此信之所行。勤行聽說法。陰蓋不能動。從信得致道。行逮於柔順。以法所得財。轉惠普周濟。護戒與毀戒。行信而等施。能悅諸悲怒。道心不懈倦。勤求大乘法。有信。悅向眾。永離大貢高。志常自卑下。所在無所著。立信相如是。志信。不惜身。終不造惡行。守善無妄語。言行常相應。悅信。以過界。樂行於無心。身為慧所將。習隨聖所護。有信。行內淨。常為慧所將。知身之要本。求問宣所聞。等念於七財。得力。根以足。長離眾邪見。志常習等行。禮恪有悅心。敬事其如師。心肅善虔恭。知足無所遺。其心常無念。所志唯道法。有厭生死者。引示無為德。脫之所當行。

唯常求悅心。速離於是世。修梵行。無憊懷。受諸眾生。救彼無利望。當報所受恩。悅信。當勤求。己利。不以悅。亦不嫉。彼供仁。忍而悉備。無諂調質。直行。信目所見。不背說人短。根寂性安敏。志悅樂。閑居其心。無憤開。自勵備恩行。先順。不有諍內。省剋己。過勤求具戒行。專習於定道。悅信。慕樂行。信者相如是。其過欲。信者彼行而解此。與法。不有諍。深妙佛所說。誠信。信於空。彼都無眾見。諸法。無有相不意。離眾念。當除斷諸念。覺了。去來事。法。永無著作。不有於身心。信為無欲。法離我人壽命。信者解本。無得至不二處。其本。無有積體。無若虛空。諸法。信亦然。便與法性同。等過於三世。諸法。無有漏欲處。及與貪樂。信無受見。諸法。不有著其本。明清淨。客欲。無能蔽。不處心有住。諸法。不可見。因緣。而無起。常觀於高行。不受所住短。無合。不有離。脫者。無合同。信。悅於空法。愚之所可惑。擔怕。意無起。欺偽。如芭蕉。口言。而自然。無去。亦不有諸法。無所有。所見。皆不要。其法。若虛空。等緣。無有數。諸法。如泥洹。本無。不可見。信。悅而行此。解了。身虛空。其有如是。信菩薩。及凡人。彼則。值奉佛。所處。無有惡。不以造色行。得應。值佛世。無色。不有處。不來。亦不去。於色。無有生。不滅。亦無住。當來。無所至。值佛。廣演說。五陰。亦如是。化習。轉無生。值佛。當散說。慧達。諸菩薩。

其身及諸情 亦習以無生 佛興以無生  
常救諸墮生 癡本無有生 生死亦如斯  
是緣如本無 從法而有佛 無起不有生  
不滅無有住 是以知無處 處亦不可見  
斯亦不自生 與佛而博演 無志不有住  
是亦佛所轉 諸種亦如是 佛種順如法  
斯類亦起無 如佛而等與 其行如是者  
佛興為若此 悅信斯大眾 其限不可量

## 轉法輪品第七

爾時世尊告太子等。又諸賢者。何謂菩薩得轉法輪。其有布露如是像法樂說句義。受持不忘修而行之。諸有不發大悲意者。為興普智隨順眾願而為說之。廣宣布示志不有倦。忽棄利養。勸念順時受持護行。斯謂菩薩應轉法輪。又若如來所轉法輪。而其法輪行像入德當粗剖說。不以起法亦不滅法。不以凡夫下劣行法。亦復不以賢聖法故而轉法輪。又其法輪。不中斷絕等斷善惡。彼以是故為無斷輪。又其法輪因緣之起。不起無起而有其轉。以斯之故為無起輪。又其法輪。不以眼色耳聲鼻香舌味身更心法諸情轉隨有轉。以此之故彼無二輪。若有二者則非法輪。又其法輪。亦不過去當來現在所著而轉。是無著輪。又其法輪不我見轉。非人命壽所住而轉。是為空輪。又其法輪。不識行想滅念之轉。是無想輪。又其法輪。不於欲界形無形界所望而轉。是無願輪。又其法輪。不計眾生有異而轉。不處二法。是凡人法是聖戒法。是聲聞法是緣覺法。是菩薩法。是為佛法。彼以是故

為無異輪。又其法輪。不以有住法輪而轉。以斯之故為無住轉法輪名乎。諸賢者等。真諦正輪。常無毀故。要義之輪。等三世故。無處之輪。諸習見處以等過故。寂寞靜輪。身心無著。不可見轉。意識離故。無樸之輪。五道不處故。審諦之輪。無諦現故。行信之輪。等化眾生用。無欺故。不可盡輪。字無字故。法性之輪。以其諸法依法性故。本積諦輪。本無積故。本無之輪。如本無故。無所造輪。無念漏故。無數之輪。導至聖故。如空之輪。明見內故。無想之輪。無外念故。無願之輪。無內外故。不可得輪。修過度故。又諸賢者。其如來者。以此法輪轉之。眾生諸意行也。其轉不轉。彼不可得。法無所捨。於時世尊說是轉法輪品之時。天龍鬼人及諸種神。欣心踊躍。顯光讚揚。如來斯法。皆同聲曰。善哉世尊。甚為難值。如來示說轉此法輪。聞者奉行則應法輪。是法名轉空虛之輪。諸已過佛及與當來。并諸現在。悉由是法。其有信者。斯則已度。諸行此法。吾等世尊。代其勸助。彼諸眾生。其興是心。常欲聞斯法輪品者。聞當發求是道要行。彼亦不久得轉法輪。於是眾中間是說者。有萬天人。皆發無上正真道意。五千菩薩逮得法忍。

於是世尊告諸賢曰。又正士等。其護正法。受持正法。營護正法。是謂護法。所以者何。於永無滅應是行者。天及世人。終不能當。於時無憂前白佛言。又唯世尊。若斯正士。以如是法而得最覺。於其本無不有惑者。又如像諸正士等。當共擁護。所以護者。令諸正士使其

速應於此大乘。彼皆行已得轉法輪。又能與識法之大明。是故世尊。以斯等教要法正護。使發大乘。以護法師安救敬禮順聽禁戒。是時世尊讚歎無憂龍王子曰。善哉善哉。無憂正士。諸發大乘。為法師故。安救擁護。是謂護法。為諸法師營護正法。護持正法。又復無憂。護正法者。得十功德。何謂為十。無其自大。降下貢高。又行恭敬。亦無諂行。勤思樂法。志慕習法。專意隨法。行觀於法。樂宣說法。樂修行法。隨所至乘順而說之。是為十行。以護正法。又復無憂。有十事行。護得正法。何謂為十。若族姓子及於族姓女。所聞法師遙禮其處。思樂得奉。來輒敬愛。供給所欲。衣被飲食。護以諸事。往詣謙敬順聽。所說以宣同學。障其說。非常樂稱歎。使譽流布。是為十事得護正法。又復無憂。有四施行。得護正法。何謂為四。筆墨素施。給與法師。衣被飲食。床臥醫藥。供養眾所。若從法師聞所說法。以無諂心而讚善之。所聞受持。廣為人說。是為四施。得持正法。又復無憂。有四精進。得持正法。何謂為四。求法精進。勤廣說法。敬禮法師。若毀法人。正法降之。亦以精進。是四精進。得持正法。時阿耨達五百太子。聞佛說是。悅懌欣喜。歡樂無量。同聲言。如來所說。甚善無比。解諸狐疑。各以宮室及其官屬。盡以上佛奉給。所應以敬順心。而重言曰。從今世尊。當勤受化。永常無倦。至於如來無為之後。佛之所說是像寶法。當共敬受。是經要品。求索通達。勸進修行。斯則世尊。吾等至願。又若如來無為之後。吾等聖

尊在所國邑。當共同心供養舍利。護奉禮敬。至於現滅也。於是賢者耆年迦葉。謂諸太子。又賢目等。如仁輩言。獨欲全完供養。如來神身舍利。汝等是言。多斷眾生諸德之本。障蔽明淨翳道。至化使興是言。何則。然者。又若如來本始造願。使留舍利。布如芥子。為諸眾生降大悲故。何得全完而獨供養耶。彼正士等。即答賢者大迦葉曰。唯然。迦葉。勿以聲聞。所有智限。而限如來深邃無極。明達之慧。所以者何。若如來者。有普智心。一切之見。處以神足。感動變化。若其興念。能使三千大千世界。天龍鬼神。各於宮殿。普令完全安置舍利。使各念言。吾獨供養如來舍利。其餘者不。又復迦葉。若如世尊。無為之後。隨眾生心。應置舍利。又復迦葉。若如來德。至阿迦膩吒天上。立置舍利。其如芥子。能普明照一天地內。是佛世尊神威變化。感動力也。

### 決諸疑難品第八

爾時賢者須菩提曰。諸族姓子。又如來者。為滅度耶。曰。須菩提。於起生處。當有其滅。須菩提曰。諸族姓子。如來有生乎。曰。如來者。如其本無。無生而生。須菩提曰。如如本無。無生不生。彼都無生也。答曰。是者。須菩提。則佛所生。如其本無。而不有生。須菩提曰。佛生如是。滅復云何。答曰。亦復如是。如本無生。於無生。無為滅度。亦爾本無。唯須菩提。不起而生。滅度亦爾。如是其滅。亦爾本無也。說是語時。無熱淵池。現大蓮花。若如車輪。數有無量種種之色。以名眾寶。而用光飾。於諸花間。有大蓮華。

色最暉明。現奇異好特。獨踊高。賢者阿難。在於無熱大池之中。觀其變化。所見若斯。尋啟世尊。今此變化。為何瑞應。興其感動。乃如此耶。如來告曰。且忍阿難。自當見之。說適未久。忽從下方。乃於寶英。如來佛土。寶飾世界。六萬菩薩。與濡首俱。忽然踊出。遷能仁界。昇於無熱大池之中。各現妙大蓮花座上。濡首童子。即就蓮花高廣顯座。是時眾會。皆悉見之。愕然而驚。時阿耨達及諸菩薩。釋梵持世。來會諸眾。悉各叉手。稽首敬禮。濡首童子。退住虛空。共持珠寶。交露之蓋。時濡首與諸菩薩。俱并蓮花座。亦踊虛空。去地乃遠。於上而雨。未曾所見。最妙蓮花。供養如來。從諸花中有聲出曰。寶英。如來問訊世尊。起居無量體祚。康強神力。安和乎。聲復言曰。濡首童子。與諸菩薩。六萬人。俱往詣忍土。至於無熱龍王淵池。觀彼感變。又志樂聽龍王所問莊飾道品入法要說。為世尊廣勸法言。便有懽悅。於是濡首及諸菩薩。從虛空下。悉詣正覺。稽首如來。欣心肅敬。住世尊前。爾時天師告濡首曰。童子。來乎。為何志。故與諸菩薩。俱至此耶。濡首白佛。吾等世尊。在彼寶英。如來佛土。寶飾世界。承聞至真能仁。如來垂慈。十方演說斯要。聞是法故。尋從彼土。昇遊詣此。奉禮天師。緣聞如來所講法也。迦葉白佛。近如世尊。寶英佛土。寶飾世界。而諸大士。忽至此耶。濡首答曰。唯如迦葉。坐一定時。極其神足。飛行之力。盡其壽命。於中滅度。而猶不能達到彼土。其國境界。弘遠乃爾。佛告迦葉。其土去此過

於六十恒沙佛剎。乃至寶英。如來佛土。曰。其來久。如而到此乎。答曰。久如耆年漏盡。意得解也。大迦葉曰。甚未曾有。唯然。濡首。是諸正士。神足若斯。濡首又曰。耆年漏盡。意解久如耶。答曰。如其轉意之頃。又曰。耆年意已解乎。答曰。以解。濡首復曰。其誰縛心。而有解乎。答曰。濡首。以心結解。非脫有解。致慧見也。曰。唯迦葉。其無縛心。以何解乎。迦葉答曰。知心無縛。斯則為解。曰。唯迦葉。以何等心。云何知心。過去知耶。當來現在乎。去者滅盡。當來未至。現在無住。以何等心。而知其心。曰。心已滅者。是濡首。即無身心之計數也。曰。賢者。心知其滅耶。曰。心滅者。不可得知。曰。其得致都滅心者。彼永無有身識之得。曰。大辯哉。濡首童子。吾等微劣。豈能應答上辯之辭。濡首又曰。云何迦葉。響寧有辯耶。曰。無。童子。因緣起耳。曰。不云乎。唯大迦葉。一切音聲。若響耶。曰。爾。濡首又曰。響辯。可致不乎。曰。不可致。又曰。如是。唯大迦葉。菩薩挾懷權辯之才。不可思議。亦無其斷。若耆年。問從劫至劫。菩薩機辯。難可究盡。爾時迦葉。而白佛言。唯願世尊。加勸濡首。為此大眾。弘講說法。令諸會眾。長夜致安。普使一切。得明法要。於是眾中有大菩薩。其名智積。問濡首曰。何故童子。長老迦葉。年耆極舊。所言怯弱。微劣。乃爾。為以何故名之。耆年。濡首答曰。是聲聞耳。故不果辯。智積復曰。斯不知發大乘志耶。曰。永不矣。唯以聲聞乘之脫也。曰。又濡首。何故名為聲聞之乘。濡首答曰。是族姓子。世尊能仁。隨諸眾生。興三乘

教敷以說法。有聲聞乘。緣一覺乘。及大乘法。所以然者。由此眾生多懷貪。志劣弱。故說三行耳。智積又曰。云何濡首。如空無相願。都無其限。何故限之。有三乘乎。曰。族姓子。是諸如來執權之行。空無相願。不有其限。為諸著限。而有諸限。終不限於無限行也。曰。又濡首。吾等可退。使永莫與劣志眾生得有會也。濡首答曰。諸族姓子。且忍。當從無熱龍王。聞其智辯及無量法。耆年迦葉。謂智積曰。云何正士。如彼寶英。如來佛土。云何說法。智積答曰。唯一法味。從其一法。演出無量法義之音。但論菩薩不退轉法。諸佛奧藏。要行之論。從已取脫。不由眾雜。依於普智。永無餘脫。恒講菩薩清純之談。其土都無怯弱之行也。

時阿耨達問濡首曰。仁尊。濡首來奉如來。為何等像。觀於如來。以色觀耶。痛想行識。觀如來乎。答曰。不也。以約言之。色苦觀耶。痛想行識。苦觀之乎。滅色痛想行識。觀耶。為以空無相無願行。觀如來乎。答曰。不也。又問。云何去來。現在相好。肉眼。天眼。慧眼。觀如來乎。答曰。不也。云何濡首。以何等相。觀如來耶。答曰。龍王。觀於如來。當如如來。又曰。軟首。如來云何乎。曰。如來者。無等之等。等不可見。用無雙故。故妙矣。龍王。如來極尊。無偶。無雙。無比。無喻。無儔。無等。無匹。無倫。亦無色相。為其無像。無形無影。無名無字。無說無受也。如是龍王。如來若此。當作是觀。觀於如來。亦不肉眼。天眼。慧眼。而觀如來。所以者何。其肉眼者。以見明故。如如來者。無冥無明。故不可以肉眼而觀。

又天眼者。有作之相。若如來者。等過無住。故不可以天眼而觀。又其慧眼。知本無相。又如來者。眾都永無故。不可以慧眼而觀。云何軟首。觀其如來。得為清淨。曰。若龍王。其知眼識。心不有起。又知色識。心無起滅。其作是觀。觀於如來。為應清淨。爾時其從寶英。如來寶飾。佛土菩薩來者。得未曾有。而皆歎曰。甚快妙哉。斯諸眾生。善值如來。逮聞如是。龍王所問。決狐疑品。聞已。悅信不怖。又無驚怪。加復受持。諷誦宣布。如是正士。應在慧署。吾等世尊。不空至此。值聞是要。無極像法。又若世尊。斯法所至。聚落國邑。當知其處。如來常在。終不滅度。正法無毀。道化興隆。何則。然者。以此法品。能降魔場。伏諸外道也。時阿耨達謂軟首曰。善修行者。軟首童子。斯之菩薩。逮聞是法。得佛不難。進已。勸人勤道。無倦也。

何謂菩薩。應修善行。軟首答曰。若是龍王。如貪行。空施行。亦空。等解於此。是謂善行。以約言之。不戒與戒。懷恚及忍。懈退精進。亂意一心。如其愚空。智慧亦空。於是等行。斯謂善行。又復龍王。如其姪欲恚怒。愚癡為之空者。無其姪欲恚癡。亦空。如參行。空無雜。亦空。於其等行。是謂善行。又復龍王。如其八萬四千行。空。賢聖正脫。亦悉為空。於斯等行。是謂善行。又復龍王。若有明賢。修菩薩行。無行。無不行。亦不見行。不有惑行。亦無念行。又不知行。於是等行。是謂善行。無熱龍王。謂軟首曰。云何童子。菩薩行於無所行乎。答曰。龍王。若初發意行菩薩道。至得佛坐。所行功德。悉由初行。

不生之行。無受處行。無護捨行。無櫟之行。又無著行。亦無諦行。無有限行。亦無惑行。又無姪行。無所作行。亦無持行。無審之行。亦無底行。是謂菩薩無行之行。若菩薩以不生之行。無行不行。得三十七品。無所造作。以慧而脫。永脫於脫。不過二際。明了本際。而不取證。菩薩作是。此謂菩薩得不起忍。如斯之行。此謂善行。說是語時。三萬四千天龍鬼神。菩薩行者。逮無從生法樂之忍。

佛說弘道廣顯三昧經卷第二

佛說弘道廣顯三昧經卷第四

西晉月氏三藏竺法護譯

不起法忍品第九

時阿耨達謂軟首曰。不起法忍。當云何得乎。軟首答曰。忍不生色。痛想行識。是謂菩薩得不起忍。又復龍王。菩薩所得不起法忍。等見眾生。以致是忍。等彼眾生。如其所生。等見眾生。亦無有生。等見眾生。以如自然。等見一切。若如其相。亦不與等。而見其等。是謂菩薩等見忍。空云何為空。眼以色識。耳之聲識。鼻而香識。口之味識。身所更識。心受法識。如諸情空。其忍亦空。過忍亦空。現忍亦空。如其忍空。眾生亦空。何用為空。以欲為空。恚怒癡空。如眾生空。顛倒亦空。欲垢起滅。亦悉為空。作是智行。斯謂菩薩行。應不起法忍之者。其等眾生。已應向脫。何則。如是。又彼菩薩。而作是念。如其以空。至於我垢。及諸眾生。空無所有。御



菩提所可言者。此何心本。為心本者。其本清淨。所謂心本。如本清淨。彼無姪欲。恚怒癡垢。曰。族姓子。欲生起。生彼從何生。而常生生。如無斷耶。曰。須菩提。其欲當生而已。生生。於心本者。不有著生。唯須菩提。若彼心本有其著者。則終無致至清淨者。是故心本都無著也。由是知欲亦為清淨。須菩提曰。云何族姓子。了知欲耶。曰。以因緣之起生也。其無因緣為不有生。唯須菩提。修淨念者。了欲無也。須菩提曰。又云何乎。族姓子。菩薩為應修淨念耶。曰。須菩提。菩薩於行而修諸行。是謂菩薩修淨行者也。唯須菩提。其有菩薩都為眾生被大德鎧化至泥洹。等見眾生本如泥洹。是則菩薩修淨念行。唯須菩提。其菩薩者。為諸聲聞及緣一覺。隨應說法。不隨是化。所謂菩薩修淨念行。唯須菩提。又彼菩薩。自寂其欲。靜眾生欲。是謂菩薩為修淨行。又須菩提。其菩薩者。在於淨念而見不修。又於不淨而見修淨。是謂菩薩修淨行者。爾時須菩提謂王太子感動曰。又云何乎。族姓之子。菩薩於淨而見不修。於其不修。見淨修念。曰。須菩提。修淨念者。謂修眼耳鼻聲香舌味身更心所受法見。悉不修。法性無二。謂修三。界不著。是菩薩住。住以善權。斯曰修念。菩薩作此行。須菩提。則謂修淨念行者也。於是世尊歎太子曰。善哉善哉。如若正士。感動所言。修淨如斯。是為菩薩。應修淨行。今若所說。皆佛威神。其有菩薩修行如此。是乃應興大乘之行。當知斯輩堅固普智。於是太子感動白佛。云何世尊。

菩薩得以無欲之心。應自歸佛。曰。族姓子。若有菩薩。了知諸法。無我人壽無色無想亦無法相。不於法性而見如來。如是菩薩。為應無欲。自歸命佛。如如來法。彼則法性。如其法性。為普所至。有得致是法性之法。則知諸法。所謂菩薩。以無欲心。應自歸法。其法性者。彼為無數。習無數者。即是聲聞。又如菩薩等。見無數。於其無數。而不有數。亦不二者。所謂菩薩。以無欲心。應自歸依。說是語時。太子感動。得柔順忍。來會色欲諸天龍人。聞此法品等二萬眾。皆發無上正真道意。

### 受封拜品第十一

爾時龍王阿耨達與宮夫人太子眷屬俱而圍繞。自歸三尊。都以宮室并池所有供奉世尊。及比丘僧。以為精舍。又復言曰。吾今世尊。興發是願。從斯大池出流。四河充于四海。從其世尊。四河之流。若龍鬼人飛鳥走獸。二足四足有含命類。飲此流者。願其一切。皆發無上正真道意。宿不發者。飲此水。已使成。其行速。在佛座降。却魔眾。伏諸外道。時世尊笑。諸佛笑。法口出五色奮耀。奕奕。火焰無數。震照十方。無量佛世。明踰日月。須彌珠寶。諸天魔宮。及釋梵殿。一切天光。盡翳無明。是時無數億千天眾。莫不懷悅。發願。聖覺光徹。阿鼻諸大地獄。有被明者。尋免眾苦。皆志無上正真道意。還繞世尊。乃無數匝。忽從頂入。爾時賢者名曰披耆<sup>晉言辯</sup>。見其光明。輒從坐起。整著衣服。偏袒右臂。向佛跪膝恭檢。又言歎頌世尊。而以偈曰。其色無量見者悅。人雄至最獨世尊。

滅除眾冥與大明。執持威神說笑意。百福所詠德七滿。得智光明演慧行。為法上講惟法王。世尊今笑何瑞應。具見誠諦常樂信。根定寂靜眾權敬。化度一切以寂然。德過無極說笑故。梵聲清徹甚軟和。鸞音商雅踰諸樂。眾音備足無缺減。解散笑故宣布示。智脫之明應慧度。行常清淨樂淡然。權曉眾行普智具。賢聖導王說笑義。智辯通達慧無極。現力無量神足備。十力已具普感動。天師現笑用何故。身光無數照杳冥。大千眾明不能蔽。踰越日月及珠火。威聖之光無等倫。功德滿足若如海。順化菩薩以智明。懷慧無限散眾疑。興發何故而有笑。尊度三界無有極。權導眾生除諸穢。能淨欲垢化無欲。天顏含笑為誰興。如來所由普感動。震動天龍諸鬼神。稽首受禮於法王。蒙說笑意決眾疑。是時佛告耆年辯辭賢者。汝見阿耨達不。供如來故造此嚴飾。曰。然世尊。已而見之。曰。是龍王。以於九十六億諸佛。施種德本。今受封拜。如吾前世。為定光佛世尊所決。汝當來世。得致為佛。號名能仁。如來無著平等正覺。通行備足。為最眾祐。無上法御。天人之師。號佛世尊。是時龍王。為長者子。其號名曰比守陀來<sup>本末晉言淨意</sup>。聞吾受決。尋轉興願。使吾來世得其拜署。若斯梵志。為是定光佛所決也。爾時淨意長者子者。阿耨達是。又斯龍王。當於賢劫中。在

此池中莊飾種種鮮交眾寶。若天宮室。當悉進奉賢劫千佛。斯諸如來盡知王意。率皆說此清淨法品。悉坐是處等。亦如今。又及如前拘樓秦佛。文尼迦葉。同共坐此師子之座。及其最後樓至如來。亦當轉此法品要義。無熱龍王當供養賢劫千佛。從聞是法。諸佛眾會悉同如今。是阿耨達後無數世。奉諸如來事眾正覺。修梵淨行。常護正法。勸進菩薩。然後七百無數劫已。當得作佛號阿耨達如來。無著平等正覺。通行備足。無上法御。天人之師。為佛世尊。如是賢者。無熱如來。得為佛時。其土人民都無貪姪。悲怒愚癡。永無相侵。不相論短。何則。然者。以彼眾生志行備故。如是賢者。阿耨達佛至真如來。乃當應壽八十億載。弟子之眾亦八十億。如其始會之為清淨。從始至終。無異缺減。如此之比數百千會。當有通辯受決菩薩。四千億人。都悉集會。又諸發意菩薩行者。不可計數。無熱如來。當為佛時。其土清淨。紺琉璃為地。天金分錯。飾用諸寶。以眾明珠。造作樓閣。及經行地。彼土眾生。若興食想。應輒百味。悉得五通。其國處所。人民居止。但以珍琦。被服飲食。娛樂自由。悉如第四兜術天上。彼不二念。又無貪欲。姪行之心。而諸眾生。法樂自娛。其土人民。都無欲垢。若彼如來。敷雨法說。不有勞想。神變無數。以演洪化。宣示經法。永無其難。方適說法。眾生輒度。何則。然者。以彼一切志純熟故。又其如來自於三千大千世界。唯一法化。無外異道。又若如來。欲會眾時。輒放身光。盡明其界。彼土人民。尋皆有

念。世尊聖覺。將演法化。故揚光耳。各承佛聖神足。飛來詣佛聽法。又彼如來。終無不定。乘大聖神。忽昇空中。去地七丈。就其自然。師子之座。廣為眾會。進講法說。普土見之。譬如觀其日月宮殿。明盛滿時。眾生種德。故生彼土。其國人民。觀於世尊。師子之座。懸在虛空。而無所著。尋解諸法。亦空無著。當爾之時。悉得法忍。其如來者。但說金剛定入之門。不有聲聞緣覺雜言。所以唯演金剛定者。譬如金剛所可著處。靡不降徹。而彼如來。所可說法。亦如金剛。鑽碎吟疑。住著諸見。如是賢者。阿耨達佛。若現滅度。而其世界。有尊菩薩。名曰持願。當授其決。然後現滅。其佛方滅。持願菩薩。即得無上最正之覺。尋補佛處。號曰等世如來。無著平等正覺。其土所有神通菩薩。及上弟子眾會。多少如阿耨達時。阿耨達王之太子。名曰當信。敬心悅欣。以寶明珠。交露飾蓋。進奉如來。叉手白佛。誰當於時。得為持願菩薩者耶。是時世尊。知王太子當信意向。告阿難曰。其時持願菩薩。大士當補佛處者。今龍王子當信。是也。時阿耨達如來。方滅。持願菩薩。尋昇佛座。又其等世如來。無著平等正覺。方適得佛。亦便轉此法品正要。當佛說是。封拜品時。四萬菩薩。得無從生忍。十方世界。來會菩薩。釋梵持世。天龍鬼神。聞佛說此。封拜法已。悉皆喜悅。歡心踊躍。信樂遂生。五體稽首。各還宮殿。阿耨達王。與諸太子眷屬。圍遶。勅伊羅蠻龍象王曰。為如來故。造作交露琦珍寶車。使其廣博。殊妙無極。當以奉送至真

正覺。尋應受教。輒為如來。化作七寶珠交露車。令極高大。廣博嚴飾。世尊菩薩及諸弟子。悉就車坐。無熱龍王太子眷屬。心懷恭恪。手共挽車。從其宮中。出于大池。如來神旨。忽昇鷲山。

#### 囑累法藏品第十二

於是世尊。到鷲山已。即告慈氏。軟首童子。并眾菩薩曰。諸族姓子。以阿耨達所問道品。宜重宣廣。使諸未聞。而得聞之。慈氏軟首。而俱白佛。唯願如來。垂慈當說。於時世尊。尋輒揚光。光色無數。天地震動。至于六反。光明鑠鑠。乃曜十方。十方佛土。諸尊菩薩。神通備者。尋明飛來。到皆稽首。各便就坐。王阿闍世夫人。嫫女。太子眷屬。舉國臣民。長者居士。梵志學者。見是光明。又聞如來。從無熱還。各捨其事。悉詣鷲山。到世尊前。肅然加敬。叉手為禮。問訊如來。景福無量乎。即退還坐。觀佛無厭。如來身光明。悉普至無極世界。諸大地獄。眾窈冥處。靡不降徹。諸在地獄。無不被明。又其光明。而出聲曰。能仁如來。於無熱池。弘說清淨道品要法。今還鷲山。而重演化。又其音聲。徹諸地獄。十方地獄。眾生之類。所受苦痛。應時得免。悉遙見佛。及諸眾會。皆自悲嗟。嗚呼世尊。吾等受此苦痛。無數地獄之酸。六火圍遶。燒炙苦毒。鋒瘡萬端。鑊湯之難。諸變種種。更斯眾痛。日月彌遠。善哉世人。值奉如來。稟佛道化。得離三苦。吾等宿世。雖遇諸佛。不受法化。使被眾痛。蒙賴如來。所說法品。令諸殃罪。而轉微輕。當爾之時。十方地獄。一切眾生。得等有億千。悉發無上正真道意。遙承佛聖。皆

同聲曰：一切苦痛本為清淨，其了本者則無顛倒。吾等但坐不了之故，更諸地獄眾苦無數，願使一切速解正真。

爾時佛告慈氏菩薩軟首童子及阿難曰：諸族姓等當勤受此是經要說，持諷誦讀以宣流布，廣為學者演說斯法，使諸四輩加心專習，是慧要行積辯句義。若族姓子及族姓女，發心怡悅向樂是經，當為斯輩解此奧藏深邃諸義，道之淵府眾經所歸，諸佛積要微妙無量。若所授者，當令字句了了分明，使無增減。又諸族姓，若賢男女在於過去恒沙諸佛所作功德，施行種種，受持諸佛所可說法，一專習勤心奉行，若復施戒忍進定智，行是六度億百千劫，奉是諸佛并眾弟子，衣被飯食，床臥醫藥，香華伎樂進諸所欲，又造精舍經行之地，奉敬如是不可稱計。至諸世尊般泥洹已，為諸如來起七寶塔，一一供養，諸如來塔，香華伎樂繒綵幡蓋，進然香燈，又懸夜光明月諸寶，供養如是極多無數。斯所行德，集會計之，都不如是族姓男女，速得一聞此阿耨達龍王所問決諸狐疑法品義也。所以者何？以斯法藏出生諸佛菩薩要行慧之最故，何況奉持執卷誦讀，以無疑心體解深妙，復以所聞宣示流布，斯諸功德不可測量也。是時慈氏軟首童子賢者阿難俱白佛言：甚未曾有，唯然世尊。又若如來慈降一切興有大悲，乃為十方未來現在菩薩行者天龍鬼神諸眾生故。弘說是法，無極清淨道品之義，又復世尊，若族姓子及族姓女，聞阿耨達龍王所

問決狐疑經，不即受持樂習誦讀，又不廣傳布示等學，亦不興心勸助之者，當知是輩族姓男女，已為眾魔及魔官屬，并邪外道之所得便。常在羅網結疑中也。時佛歎曰：快哉所言，誘進一切使習斯法，令行應之。如來又曰：當以是經數為四輩宣廣說之。爾時慈氏軟首菩薩賢者阿難皆白佛言：唯願世尊，輒當受持布演是法，又復世尊，此經名何？當云何奉持？世尊告曰：斯乎族姓，名阿耨達龍王所問決諸狐疑清淨法品，亦名弘道廣顯定意，當勤受持斯經之要，又族姓等，是道品者珍護諸法經之淵海也。慈氏菩薩軟首童子及諸來會神通菩薩釋梵持世天龍鬼神，同聲白佛：甚善。如來快說是法。吾等世尊，在聚落國界縣邑，有行是法，當共躬身營護。斯輩其聞此者，令無邪便。吾等亦當受持是經，使普流布而常無斷。佛歎慈氏軟首童子并眾菩薩曰：善哉。諸族姓子，卿等所言勸樂將來諸學菩薩，快甚。乃爾佛說此已，十方來會神通菩薩七萬二千悉逮顯定，五萬四千天龍鬼人皆發無上正真道意。五千人得生法眼。阿耨達龍王慈氏菩薩軟首童子一切菩薩賢者阿難來會四輩及諸天龍種種鬼神人與非人，聞佛說是莫不歡喜。稽首佛足各便而退。佛說弘道廣顯三昧經卷第四。

### 無極寶三昧經卷上

No. 636 [No. 637]

西晉月氏三藏竺法護譯

聞如是一時佛在羅閱祇竹園中，與千二百五十比丘俱。菩薩九十億人，皆如文殊師利等，是時竹園四面周匝，地自然生文陀般華種種妙色，非世所有。華華各有百萬之葉，華上各各有佛坐之。佛上各有交露寶蓋，蓋間各有伎樂之聲。一佛之前各有菩薩，皆如文殊而坐問事。竹園之地如三彌佛刹，皆悉平等。大千刹土日月之光，皆悉蔽沒無復明耀。百日之中但見諸佛，諸大泥犁皆得休息。百鳥禽獸不飲不食，皆得法味。百天安寧，見佛歡喜自忘食心。一切人民普得法味，百天安隱無飲食想，心意快然發無上意。一切樹木皆有音聲。竹園之中化有浴池，池中生十萬種華，華有交露師子之座，各有菩薩而處其上。其邊各有天人立侍，帳間各各萬種音樂，千歲枯樹悉生華葉，一切樹木皆傾相向。竹園左右女人見佛者，皆化作男子，無復愛欲。悉得法眼。爾時佛作寶如來三昧，遍悉感動九萬億刹，四方四隅上下方面無極佛刹，各遣菩薩齎持妙華來詣竹園，禮事供養，訖各却坐。釋梵四王愛欲諸天，各與眷屬於虛空中，以天華香伎樂供養。諸大龍王阿須倫王迦樓羅真陀羅摩休勒等，各自與無數官屬來詣佛所，禮事供養。舍利弗白佛言：今所感動是何瑞應？佛言：無應之應是其應也。舍利弗言：無應之應其義云何？佛言：汝往問於寶來菩薩，則當為汝演說此義。即時舍利弗問寶來曰：今此感動為何瑞應？寶來菩薩答舍利弗：羅漢疑重故未解乎？有思想者非盡

之法。無想無作是為法寶。昔者我始發意之時。與三十六億人求菩薩道。時釋迦文亦在其中。一切所志皆有起滅。諸法本空。譬如野馬。無想起作。持是作法而滅行求。願想得是。自言得道。起想罪根。壞滅諸慧。求於三尊。想取泥洹。疑盡滅身。而生死不斷。羅漢得泥洹。譬如寐人。其身。在床。一時休息。命不離身。羅漢得禪。故是大疑。寶來又問舍利弗言。譬如龍王。興作雲雨。四面合冥。不知所從來。菩薩從第九已下。悉已逮得六萬三昧。其所興為。固不可限。亦何復疑。所從來處。舍利弗言。我學不得善知識。故令我疑根不斷絕耳。今聞尊法。無所復益。譬如人為百鳥作樂。樂雖和妙。鳥不聽受。今我如是不了是法。一切新學菩薩。大士聞是三昧。德尊無量。譬如夜時。暫見火明。火滅之後。故冥無見。今我如是。無益已矣。願作八千里火。以身投中。如是億劫。然後乃出。復入三惡道。為一切所噉食。數千億劫。後生作人。求善知識。寧可得。寶來答曰。火雖廣大。心垢叵燒。學無遍和。拘舍羅不得善知識者。不得薩芸若也。寶來菩薩白佛言。諸法無主。誰為成薩芸若者。誰成正覺。弟子緣覺。惟加大恩。演示其義。佛言。善哉。所問深妙。乃欲決斷生死之根。今為汝說。諦聽受之。若善男子。善女人。欲得阿耨多羅三藐三菩提者。當行九法寶。一者見諸天。無有處但有名耳。二者見世間人民。但有字耳。三者見五道勤苦。但有習耳。四者地水火風。亦本空耳。五者當來過去。現在如芭蕉。無想。六者

現生死。無本際。七者觀諸三昧。寂無往來。八者當觀大千諸佛。剎土了無得三昧者。九者見大千剎土中。一切蠕動。悉欲度之。令與佛等。是為九寶。得是無作之想者。可得決斷一切大想。寶來又問。諸法無想。當作何住。得無所住。佛言。諸法無住。住則為想。無起之念。非想非道。亦復是想。斷求無想。得住無住。寶來又問。當作何緣度於眾欲。佛言。眾欲無垢。無度。無主。無往無來。如虛空。觀與泥洹等。與無名等。寶來菩薩言。善哉。善哉。深妙。乃爾。般施菩薩白佛言。菩薩欲得坐佛樹下。莊嚴剎土。教導十方。令諸佛土。如今竹園。普使逮得無所從生。修行何法。而得致此。佛言。當行八直。一者直無名之響。二者直無名之聲。三者直觀十方佛土等。無有二。四者直見大千剎法等。無異。五者直觀十方一切欲。令與佛等。六者直於無形見一切。無有起滅。七者直見入諸三昧。無有往來相之想。八者直見十方諸佛。般泥洹。不般泥洹。亦等無異。是為八法。菩薩從是疾得無所從生法。忍。教授十方。得如竹園。寶來菩薩復白佛言。今諸上人。各從遠來。覩見世尊。歡喜忘食。乃得值聞。是尊三昧。為是宿福。本願所致耶。佛言。亦非本願。亦不離本願。所行常精進。不失諸三昧。常隨善知識。遠離於眾事。寂然不數會。但志在三昧。今故以寶珠來。雨眾會上。寶來復問。新發意菩薩。欲行是三昧。當云何行。而得致是。佛言。當行八法寶。得是三昧。一者即於佛前。得是三昧。二者供養十方羅漢真人。行菩薩法。億劫不懈。

一時間是三昧尊法。解說親近。奉不遠離。三者供養舍利。起塔彌滿。殖福無缺。而於法無益。一時轉意作行者。即向慧門。四者得四無畏。於十方生死。無所遠離。五者菩薩見五道勤苦。意欲度之。沒命救濟。不以為劇。又欲令彼得安。至佛。六者菩薩事人如奴事大夫貴。欲度之。不以勤苦。所以者何。知本無故。七者菩薩親見九十六種外道。於中覺知欲起法住。八者奉行六波羅蜜。供養比丘僧。雖億萬劫。不如一時間是三昧。十方其有當作佛者。用何為證。聞是三昧。即知是人。為得佛證也。其有發意向是三昧。歡喜信樂。而解慧者。即為已解六萬三昧。是為八法寶。行是三昧。即得陀隣尼門。佛於爾時。欣然而笑。光耀燁燁。靡不遍照。文殊師利。稽首白佛。佛不虛笑笑。將有意。佛語文殊。審如所言。是寶來菩薩從寶如來。佛剎來。去是九億萬佛國。其剎名曰諸法自然。其有善男子。善女人。往生者。不從胞胎。不更苦痛。無有恩愛。皆於自然華香中。生。生即住。立無乳哺者。自然伎樂。朝暮娛樂。寂然清淨。以為法僧。若善男子。善女人。聞是三昧。即却六百四十萬劫之罪。罪盡命終。便得往生彼國。寶如來剎。無日月光。雖有日月。明蔽不現。若人往生者。日月星宿。即為出現。其見日月星宿。有光明者。即知有人當往生也。而諸聲聞。不逮知此。唯佛世尊及神通菩薩。乃見知之。是故我今而笑之耳。賢者須菩提。提及舍利弗。俱前稽首。而白佛言。願加大恩。加我威神。得至彼剎。諸法自然國。

禮事供養須臾來還。佛即聽往俱到彼國。即至而見其中所有。俱亦復有羅閱祇城。亦有竹園。釋迦文佛一切所有如此無異。舍利弗問須菩提。恒薩阿竭隨我來乎。須菩提。舍利弗。禮事畢訖。從彼來還至觀眾會。續自如故。佛問舍利弗。向至彼國皆何等見。對曰。我見彼國悉如此間。諸佛之功德甚尊甚尊。僥哉會者得遇見此也。

三彌菩薩從座起。整衣服稽首佛足。願欲所問。無生之法為有想無。未起之想有識無。泥洹寂然有定無。泥曰。不起有形無設無形。而在彼間教生死五道誰是主者。佛言。諸法本無一切清淨。因緣起滅故生諸法。以空造空。本無是主。三彌菩薩聞佛所說。諸天及人八萬六千皆得無所從生。法忍昇住空中。去地百六十丈。從上來下稽首佛足。是時三千大千剎土地大震動。彌勒菩薩白佛言。向者地動是何瑞應。佛告彌勒。今地之動非獨此也。十方諸剎地亦普動。諸剎亦復各有八萬六千天與人得無所從生。住在空中皆如此也。彌勒復問。菩薩云何得致無所從生。法忍佛言。有六法得致之。一者知天及人當得佛者。未得前者我當往。前之不與十方天下人共知之。二者大千剎中。若善男子善女人當得佛。未得前者我往。前之不與十方天下人共知之。三者諸地獄中人當得佛者。我悉當往。前之不與十方天下人共知之。四者十方人絕命所生處。我悉知之。不與十方天下人共知之。五者十方天下人壽命盡。我悉知之。不

與十方天下人共知之。六者十方諸佛取泥洹不取泥洹。我悉知之。不與十方天下人共知之。是為六法。疾得無所從生。法忍。彌勒菩薩白佛言。是三昧者為極大尊。欲令眾會普共逮得。當行何法而令得之。佛言。當行九法。一者視諸法悉清淨無邊。二者視諸天亦清淨無邊。三者視諸生死清淨無邊。四者視五道悉清淨。五者於欲無所求。悉清淨。六者視三界色悉清淨。無有邊。七者視泥洹悉清淨。無有邊。八者觀泥犁悉清淨。無有邊。九者見十方無有舉名者。是為九法。菩薩行如是者。疾得是三昧。彌勒白佛言。菩薩得六萬三昧。三昧寧有邊幅無耶。而得六萬三昧。是為無邊幅乎。佛言。雖得六萬三昧。但有名耳。不可極盡。三昧悉具足。又三昧者非但一品。有無念三昧。有離欲三昧。有坐聽十方佛三昧。有莊嚴諸佛國土。華香自然來三昧。有所說法。一切人悉逮本三昧。有出諸法無還想三昧。有說經時化為百種音聲三昧。有說法億千萬佛國華香自然三昧。有伏諸群生三昧。有發師子意獨行獨步三昧。有所見處莫不發阿耨多羅三耶三菩提三昧。有所在處莫不供養三昧。有亂風一起時。如佛說經聲三昧。有所向門莫不開三昧。有所在處師子為現三昧。有飛到十方三昧。有向門莫不開十方菩薩往來無極三昧。有坐知十方人意三昧。有壞滅諸想三昧。有壞滅諸識三昧。有合十方諸剎土合為一剎三昧。有發意不盡三昧。有視三界了無一人三昧。有住一佛國到一

佛國三昧。有所在處令法不斷絕三昧。有所在常與佛相遇三昧。有坐觀十方大兵大火大水大風於其中。不恐怖。悉往教導之三昧。有所在處但以法作器三昧。有善男子善女人聞是三昧。即得往來無還之想三昧。如是三昧不可極盡。今為會中粗說之耳。有無名三昧。有住諸法三昧。有名諸慧三昧。有教法三昧。有滅壞羅漢辟支佛三昧。有法寶三昧。有總持無名法三昧。有知人意三昧。有斷諸煩惱三昧。有制力欲覺三昧。有滅十方種力三昧。有智慧光明所處三昧。有不可計三昧。有見法時如水影三昧。有不可盡淨慧三昧。有空諸惡三昧。有無願想三昧。有住禪乃到泥洹三昧。有譬若金剛無穢三昧。有極明三昧。有過諸煩已盡三昧。有廣大水法三昧。有莊嚴大船三昧。有入無名三昧。有不盡喜意三昧。有總持無所忘三昧。有在冥悉令明三昧。有所樂悉樂三昧。有慈行三昧。有淨大哀三昧。有入等心三昧。有出等心三昧。有名已脫未脫三昧。有光明所從來處三昧。有曉無所曉三昧。有脫慧脫教三昧。有蓮華為現三昧。有離無常三昧。有尊智慧無主三昧。有勇猛無所不伏三昧。有開闢諸剎三昧。有清淨無形三昧。有無名寶三昧。有如海無所不受三昧。有神足廣大三昧。有如彈指無所不及三昧。曇摩菩薩語舍利弗言。所問慧住故曰不可極。是應時聞所聞如意。不自貢高所作不忘。常敬意如所教習慧。用意無所受故不失禮節。所作法不忘不亂。意如珍寶除諸老

病以意為法器。是為樂忍辱。所思但想諦言。所樂但法慧。不用足時所施無所惜。所與無適莫。所聞諦意觀歡喜無所得。其意已悅。身體為輕。意不在外道。但欲聞法味。及比羅經。但欲聞漚和拘舍羅。但欲聞四等心。欲聞無底法。如意不異念。欲意受漚和拘舍羅。欲聞無所從生法。不貪觀。但欲意受慈度之。欲知無常聲。欲知寂然之意。欲知空復是空。欲知無想生死及布施。一切不欲聞。但欲聞音樂。隨樂十方忠信。以作正降伏諸欲根。

曇摩菩薩白佛言。菩薩已得寶如來三昧。自在所為眾慧已具。便得三寶。一者譬如水中影。影亦不在水中。亦不在水外。菩薩於是間坐。其身悉在十方。其身亦不在十方。二者菩薩於是間坐。分身悉現十方。佛前坐。其身亦不在十方。佛前坐。三者譬如山中呼響音聲。還報音響亦不在內。亦不在外。菩薩於是間坐。悉遙說十方佛諸菩薩事。十方諸菩薩亦無往來到彼者。彼亦無往者如是也。佛語曇摩菩薩。已得陀隣尼門。譬如持弓弩布矢。在欲所射無所不到。菩薩持一慧入萬億慧。靡所不至如是也。佛告曇摩菩薩。汝見阿須倫欲興兵時。彈指之頃。兵到六天中間。無空缺。菩薩已從第九以下。欲說法時如是也。寶來菩薩語舍利弗言。淨者貪欲消伏。其意無貪。欲者是不可盡。其諸惡意者不能伏。復亂其意。護於惡意。是故不可盡。其意瞋恚有形欲貢高。諸所不可索。可欲作。菩薩常欲護是意。知不可盡去諸垢。當知意不可盡。護者不令

懈怠。當知其意不可盡。其狂亂者轉以法護之。當知意不可極。無智慧者欲護之。知意不可極。一切以法施與法脫之。當知意不可盡。欲教一切人皆令為功德。當知是意不可盡。寶來菩薩語舍利弗言。菩薩有四法。一者意作陀隣尼行不可盡。二者陀隣尼所入行不可盡。三者以陀隣尼教一切是不可盡。四者博學問故陀隣尼不可盡。是為四。復有四事不可盡。一者上脫中脫不可盡。二者四馬之路不可盡。二者可意之王不可盡。四者十二因緣無有主不可盡。是為四。復有九法不可盡。一者無我之語不可盡。二者無作之想不可盡。三者寂寞泥洹之語不可盡。四者所度不可盡。五者大海流水無有懈倦不可盡。六者諸惡無垢不可盡。七者苦痛之聲不可盡。八者去來之想不可盡。九者所度無主不可盡。是為九。復有九法不可極。一者諸佛刹土不可極。二者諸菩薩所從來處不可極。三者發阿耨多羅三耶三菩提心者不可極。四者失願取羅漢辟支佛不可極。五者十方菩薩從一佛刹飛到一佛刹不可極。六者六波羅蜜不可極。七者三三昧不可極。八者過於泥洹亦如化不可極。九者三昧不可極。是為九。寶來菩薩語舍利弗言。菩薩有三十二寶。一者其心不著愛欲。是即忍辱不可極。二者不起我非我亦無所造。是故忍辱不可極。三者不念一切善惡。是為忍辱不可極。四者不恨心意於一切。是為忍辱不可極。五者不瞋怒向一切人。是為忍辱不可極。六者不懷念他人惡。是

為忍辱不可極。七者亦不妄嫉人有所繫。是為忍辱不可極。八者於大會不調戲於座中。是為忍辱不可極。九者自護護他人身。是為忍辱不可極。十者有貧窮者給與護之。從後無所悌望。是為忍辱不可極。十一者自制不隨惡知識。是為忍辱不可極。十二者無有愛欲意於身及他人身。是為忍辱不可極。十三者不起諸想。無念善惡如彈指頃。是為忍辱不可極。十四者護於功德莊嚴身相。是為忍辱不可極。十五者信作善不離於三昧。是為忍辱不可極。十六者常護口不妄言。是為忍辱不可極。十七者心意清淨。是為忍辱不可極。十八者堅住善知識世世與相隨。不於他處說其過惡。是為忍辱不可極。十九者自按計他人有惡者。我亦有惡。是為忍辱不可極。二十者所念無有邪。邪即覺。是為忍辱不可極。二十一者軟心和意。是為忍辱不可極。二十二者護惡人令心不起。是為忍辱不可極。二十三生天者教導諸天。是為忍辱不可極。二十四生天上世間教兩道中不更三道。是為忍辱不可極。二十五者具足諸種好。是為忍辱不可極。二十六者得音如梵天聲。是為忍辱不可極。二十七者脫婬怒癡。是為忍辱不可極。二十八者不於諸色及名有想。是為忍辱不可極。二十九者所作功德不著。但欲起眾法耳。是為忍辱不可極。三十者降伏諸外道。是為忍辱不可極。三十一者已出諸病中。是為忍辱不可極。三十二者具足諸佛法使不傷誤。是則為寶不可極三十二事。

復次舍利弗。復有三十三事為所入寶。一者欲入響。欲入觀。觀無所觀。是即為寶。二者欲入心。離心。是即為寶。三者於心無主。是即為寶。四者欲入身。求脫本無脫者。是即為寶。五者欲入十二因緣。無有住者。是即為寶。六者欲入不斷離於不斷。是即為寶。七者欲入無常視之無形。是即為寶。八者欲入無名主離於無名。是即為寶。九者欲入寂不離於起。是即為寶。十者欲入三界不離三界。是即為寶。十一者受無所受。是即為寶。十二者欲入當來過去。亦出當來過去。是即為寶。十三者欲入功德觀本無主。是即為寶。十四者欲入空中空。是即為寶。十五者欲入無相不起無相。是即為寶。十六者欲入願離願。是即為寶。十七者欲入空離空想。是即為寶。十八者欲入三昧無有合。所以者何。法無二故。是即為寶。十九者不以三昧有所願生處。是即為寶。二十者三昧不為一切諸法作證。是即為寶。二十一者欲入無生之道。無有度者。是即為寶。二十二者欲入無生處。是即為寶。二十三者欲入不動搖處。是即為寶。二十四者欲入一切無我不離無我。是即為寶。二十五者欲與生死初無相知者。是即為寶。二十六者欲與三昧初無相識者。是即為寶。二十七者欲入相初無相知者。是即為寶。二十八者欲入欲厭欲意。是即為寶。二十九者欲入不念無有念。是即為寶。三十者欲入陀隣尼門。無所不總。是即為寶。三十一者欲入者所作惡欲不為惡。是即為寶。三十二者欲入漚和拘舍

羅以意作法器。是即為寶。三十三者欲與萬事相應不相遠。是即為寶。三十二事

佛語文殊師利。譬如欲入城。當從其門。欲知因緣無所諍。欲知諍者不如自守。欲知不欲語言者不如莫在中。不欲動者勿得轉。欲無悌望者當無所想。不欲色者當正住。不欲有異者當寂自守。能自守者不稱說不自高。自下者其人已具足故。欲有所便者所作無所失。得道亦如是。無有疑。無有疑者知本無故。知本無者無所失故。三世等無有畏。三世無增減者不住色。已不住色為不住眾法也。眼見色者。但是眼睛住。非是色也。耳聞聲。聲無所住。鼻識香。香亦無所住。口識味。味亦無所住。意亦不知識。識亦不知意。意無所住。如本行無有想。慧行諦諦如是。無有我。是我。諸法見但見無我。慧不知所有。所有亦不知。慧慧不知習。習不知慧。菩薩心不離心。曇摩菩薩白佛言。道不與想合者。為有合者。無。佛言。諸法不以想為證。但以音響為法。譬如人吹笛。聲音悲快。與歌相入。音均合同。諸三昧者亦如是。諸化亦如是。念亦如是。覺亦如是。生死無名。離於無名。念化覺亦如是。諸名無處。我不想之。無作之想。為離無離。無作之作。以為作想。想行寂然。都無所有。諸法非欲一切皆然。寶來菩薩白佛言。諸寂不起。欲決斷大疑。各還本處。佛言。諸法處無有處。化亦無處。念亦無處。又問。生生處有生處。無。化化處有化化無。念念處有念念無。覺覺處有覺覺無。佛言。生生復生。泥洹生。是為合。怛薩阿竭意。

生生復生。不生泥洹生。是為不合。怛薩阿竭意。化復化。不化泥洹化。是為不合。怛薩阿竭意。化復化。不化泥洹化。是為不合。怛薩阿竭意。念念復念。不念泥洹念。是為不合。怛薩阿竭意。念念復念。不念泥洹念。是為不合。怛薩阿竭意。覺復覺。泥洹覺。是為不合。怛薩阿竭意。覺復覺。泥洹覺。是為不合。怛薩阿竭意。文殊師利菩薩說頌言。

合為一淨耳。生生不復生。泥洹皆如是。化者從本無。化化無脫者。化與泥洹等。寂然無處所。念者本無識。發念因空耳。泥洹與念等。所念諦如是。覺覺平等行。所覺無所到。所覺無常住。是怛薩阿竭。化處無有處。所覺無所到。若化無處所。諸法皆如是。生處有本無。無生是其處。化處無名處。一切為三昧。念處有念無。從空到其處。非本無所諦。其慧已如是。覺行不相連。覺不離其處。行從覺見諦。離覺無有脫。所生法不絕。所在常如是。三千日月中。所明無有上。法者非思想。所當還行者。於欲不起垢。非空亦非想。如來意常淨。亦不處法名。所脫非常住。一切如本處。華香自然來。所出無處所。清淨竟無處。所有皆悉爾。千歲枯樹生。皆從發意起。皆見大光明。世明最無有。虛空為音樂。晝夜光明見。是時大會者。悉發菩薩意。人民大歡喜。皆得聞是經。即動三千剎。得受不動身。寂然法為見。無名是其應。何況世所有一切皆如是。

清淨不為定 癡慧本無是 淨癡合同本  
慧本無脫者 三昧無所起 一切皆如是  
菩薩住道地 在意所從生 五事不可親  
令墮三道中 遠離如是行 得佛達十方  
百日得法味 奉行是三昧 皆從諸剎來  
飛來至佛所 諸天及國王 悉得見佛身  
志意大歡喜 身體為悉輕 不當以色想  
觀法有三尊 般若比羅經 所處無三千  
如來本發意 願不離十方 常作大法園  
所處無三千 三界之中人 及上忉利天

化道在何所從何所來去至何所舍利弗言  
化無處所寶來言何知為化舍利弗言但見  
化成時不見本末故名為化寶來曰是故無  
所有也舍利弗言見者為倒見乎無所見何  
等為見寶來曰諸想如化是為見未起法如  
化未來法無名是為見無造法未作法是為  
見無有造化者但作無名之想是為見恒薩  
阿竭作無造之作是為見舍利弗言於是見  
中有往來無寶來言無往來者以故為見設  
有往來者是不為見是為倒見也

羅蜜沒六十二劫後與法自然佛會斷我諸  
疑逮得本無立於空中諸根即斷見於慧門  
得無動之形從是轉行便斷法輪便從正覺  
受是三昧雖六十二劫發意於法無益後與  
法自然佛會便得大樹乃更發意發意時有  
九十億人俱共發心求阿耨多羅三耶三菩提  
彌勒菩薩白佛言初發意者有幾法佛言有  
九法一者遠離眾會常志寂靜二者得善知  
識從受法不失三者遠惡智識不與從事四  
者常遠離五事一者惡沙門二者惡婆羅門  
三者惡黃門四者惡牛惡馬五者蛇虵毒蟲  
此五者不當與從事未得道頃令人入泥犁  
以故當遠之五者初發意求羅漢辟支佛心  
者當遠之當覺諸魔事不當與共事也六者  
但夢中見佛說深法七者但為法發意不在  
飯食八者不當數聚會有所悵望九者當等  
心於十方等心於三昧志欲坐佛座不恐怖  
是為九法佛說是時六萬愛欲天子皆得是  
三昧諸天飛在空中悉言善哉善哉得聞是  
法福德無量彌勒菩薩白佛言是諸天子得  
聞是法自持功德持佛威神耶佛言是諸天  
子今聞是者宿命已事二萬佛供養舍利如  
須彌山雖有是福無益於泥洹今聞是三昧  
起壞前福所以者何前世所殖福皆有生滅  
今是三昧以空壞有彌勒又言聞是三昧者  
後得無復壞滅耶佛言是三昧終不可壞所  
以者何三昧無名處無想處無念處無形處  
無識處無威神處無有結行求脫處三昧清  
淨是不到彼彼不到是無有願想非想處無

有造作。於化無有形處。無生死斷無斷處。但有名。但有響。但有聞慧之處。慧無所到。無作器。是故不可壞。不可滅。無色處。於欲無作識處。無起行處。不受眾味。無有形。無出入。無生處。無應處。寂然無動。無邊幅。不可壞敗。欲壞敗者。是大癡根。生死之門也。又舍利弗。有五不直。不當與從事。一者不當處法。有二。二者不當於法有所起。三者不當現諸法。是非無有名者。四者不當於當來過去有所見。五者諸法不可斷。是為五。菩薩得是無去無來法者。疾得阿耨多羅三耶三菩提。

無極寶三昧經卷上

### 無極寶三昧經卷下

西晉月氏三藏竺法護譯

須菩提。白佛言。若有念苦樂者。則不離於苦樂。是則為二法。菩薩者。不中離。不上離。不脫離。不中無所離。於所作遠無作。是為作所起如幻。以幻脫幻。幻中無幻。幻中無名。如是亦不從法得度。亦不離法得度。於脫中復脫。是為無有主。但有名耳。於字無知名者。是為法輪斷。舍利弗。言。法輪本清淨。無所有。誰有斷輪者。寶來。曰。不知輪有處者。是即為斷。佛言。貪可法者。是為生死根。滅法亦為無結之作也。無作之作。是為不離作。離貪諸可。即為無有斷者。無貪不起。是即道。無可不可。無生不生。無識不識。無死不死。無斷不斷。無遠不遠。諸可不可。所住無想。離於無想。所念無念。所

說無所說。泥洹無滅。離於無滅。泥洹無形。離於無形。泥洹滅盡。無所盡。諸法寂然。離於寂然。諸法無可不可。不可不有所失。於慧離本。非名無想。所明無所明。於明冥無相知者。癡慧無相入者。於道無有得道者。若苦若樂。無相識者。所起無所想。於清淨無難易。所度無有主。所至無相離者。諸法非名。離於非名。所度如流水。於名無轉者。如是者。皆即道也。佛以三昧度如人意。以萬物自莊嚴。但莊嚴無形。莊嚴倒見。莊嚴諸可。意王。莊嚴是想。非想耳。

文殊師利菩薩。白佛言。此諸天人。來在會者。有幾所人。得是三昧。佛語文殊。今是會者。諸天及人。一切普悉。得是三昧。逮是功德。悉當作佛。當受尊決。斷於五道。爾時會者。聞佛所語。八千億諸天及人。悉得無所從生。法忍。即昇虛空。去地三百丈。其身上各有萬億華香。却乃來下。稽首佛足。阿樓菩薩。呵提菩薩。從坐起。白佛言。是諸上人。飛在空中。身上華香。從何所出。佛言。譬如淨帛。本自淨潔。在所染之五色鮮好。帛本自淨色。本亦淨。二物因緣。故得明好。色亦不入。帛亦不入。色以淨因緣。而得發明。菩薩清淨。故致華香。其所因緣。亦復如是。菩薩亦不在華香中。華香亦不著菩薩。諸天及人。得斷念想。逮明慧法。便有華見。用華淨。故因緣興耳。法亦如是。無住者。成諸功德。住想行者。開生死門。羅漢辟支佛。所以由遠五道者。但用十倒見。故一者見諸功德。悉言脫者。悉為倒見。二者見五道勤苦。欲取泥洹。是為倒見。三者見萬物無常。欲疾離

之。是為倒見。四者求安本自無本。是為倒見。五者知出無間。入無處。世自無出。求之不止。是為倒見。六者羅漢取泥洹時。身中自火出。火亦無處。便起想。出身中火。自燒者。故知生死不斷。是為倒見。七者本末不可盡。而自求盡。是為倒見。八者欲於泥洹滅盡諸惡。不知無主。反欲滅之。是為倒見。九者所施與。不發一切人意。但欲法不斷。是為倒見。十者於苦於樂。不等淨行。言有二法。是為倒見。行菩薩道。當知是事。而疾離之。

佛語阿樓菩薩。摩提菩薩等。今是諸天及在會人。皆是往昔阿耨耨佛時人也。今於我前。悉前之者。宿命已於六萬佛所受是三昧。今故於此。而前之耳。却後我法。欲斷絕時。是等當有四十萬人。當持法。住令不斷絕。然後久久有惡沙門。若壞戒人。當壞我法。須菩提。白佛言。何所菩薩護法。令不斷絕。佛語須菩提。是四十萬菩薩。悉住第八已下。於法煩荷之想。是為護持法。令不斷絕也。須菩提。白佛言。何等為壞法者。願佛說之。佛告須菩提。若有得羅漢辟支佛。若沙門及天人。起想煩荷。於法求名。壞亂本慧。妄增減法。枝掖解說。以偽錯真。以辯亂道。不惟空慧。而務嚴飾。聞佛可得志存超獲。不知漚和拘舍羅。而不勤殖德行。為是法賊。破我道者也。阿須夷天。潘那提天。提樓尼天。拘屬提天。施那利天。俱白佛言。願持形壽。歸持法者。千億萬劫。無休息時。常令我等。得是三昧。佛言。其有德人。奉行三昧。如法不失。則得佛疾。其有發意行是三昧。